



册府元龟  
卷之八十四  
至六



13
849
31





849  
31



册府元龜

淮南李嗣京參閱

西極文翔鳳訂正

豫章黃國琦較釋

帝王部

八十四

赦宥第三

唐太宗以武德九年八月甲子卽位詔曰惟天爲大  
七政所以授時惟辟奉天三才於是育物故能彌綸  
宇宙經緯乾坤大庇生靈闡揚洪烈我大唐誕膺嘉  
運載協昌期不受龍圖肇開鳳紀太上皇徇齊作聖



唐哲欽明奄有八荒光澤四表牢籠軒昊跨躡殷周  
金鏡俯臨玉燭遐被然而至德無宰成功不居高謝  
萬邦委茲重器郊禋曠禮士民翹屬欽惟宗社義存  
享獻朕以寡昧實膺統緒辭不獲免式纂洪業靈命  
既臻川升寶位君臨兆庶繼軌百王若涉大川罔知  
攸濟方資命哲其康治道今紹祚伊始奉答天休思  
敷惠澤被于黎獻可大赦天下自武德九年八月九  
日昧爽以前罪無輕重已發覺未發覺繫囚見徒悉  
從原免武德元年以來責情流配者亦并放還凡厥  
庶僚進爵一級其五品已上先無爵邑封開國男六

品已下各加一轉關內蒲芮虞秦陝崑六州免二年  
租調自餘率土普給復一年八十已上各賜米二石  
綿帛五段百歲已上各賜米四石綿帛十段仍加板  
授以旌尚齒鰥寡孤獨不能自存者量事優恤其有  
至孝純著達於鄉黨徵詣闕庭厚加褒擢節義之夫  
貞順之婦州府列上旌表門閭高年碩學直言正諫  
所在長官隨狀薦舉亡命山澤挾藏軍器百日不首  
復罪如初敢以赦前事告言者以其罪罪之  
貞觀二年三月庚午詔曰宥過肆青列聖所以垂風  
一面三驅至人所以被物故知畫冠化俗義在無刑



擊磬求情志存踈網然去聖茲遠淳風漸薄上陵下  
替獄訟繁興罪名日積於簡書深文亟陳於嘉石自  
非帝堯臨政臯陶作士觀色聽聲哀矜靡失雖復三  
章兩造能無冤濫自新改過其道何由朕以虛薄恭  
膺大寶寅對三靈君臨九服昧且求衣夜分忘寢履  
薄乘奔未足爲喻兢兢業業懼弗負荷是以詳詢卿  
宰下及芻蕘務求切益救其不逮推赤心於萬物罄  
誠言於多士惟以蒼生在念豈矜黃屋之尊嗟四海  
之未寧慮一物之失所飭躬厲已無忘晷刻率斯道  
也庶感幽明思與群辟俱興至治而世教未康玄風

尚鬱去歲霖雨旣損秋場今茲旱蝗又傷宿麥萬姓  
嗷然懸磬已甚此皆朕之不德兆庶何辜將繇視聽  
弗明刑罰失度遂使陰陽舛謬氣序乖違矜物罪已  
載懷憂惕若使年穀豐稔天下又寧移灾朕身以存  
萬國是所願也其心無吝此言之信有同皦日故披  
露胸臆義在無隱八方率土想見朕心今東作方興  
而膏澤不降仰彼雲漢翹心何已宣布寬大之恩以  
順雷雨之德可大赦天下

四年二月甲寅詔曰天生蒸民楙之司牧莫不仰膺  
靈命克嗣寶圖用能永享鴻名常爲稱首朕君臨八



方于今四載夙興夜寐無忘晷刻履薄馭朽思濟黔黎推心至誠庶幾王道上荷蒼昊之睠下藉股肱之力宇內休平遐邇寧泰率此區域致之仁壽憬彼葷戎爲患自昔軒昊以來嘗罹寇暴是以隆周致涇水之師強漢受白登之辱武夫盡力於關塞謀士極慮于廟堂征伐和親無聞上策有隋災亂憑凌轉甚疆場之萌曾無寧歲朕韜干鑄戟務在存養自去歲迄今降歎相繼不勞衛霍之將無待賈晁之畧單于稽首交臂藁街名王面縛歸身夷邸襁負而至前後不絕被髮在衽之鄉狼望龍堆之境蕭條萬里無復王

庭唯頡利挺身逃竄林穴天網雲布走伏何所大同之世諒在茲日斯皆上玄降祐清廟威靈豈朕虛薄所能致此方欲致仁化物宜存寬惠思與萬邦同享斯福可大赦天下自貞觀四年二月十八日昧爽已前罪無輕重自大辟以下繫囚見徒皆赦除之逋負官物三分免一分其謀反大逆妖言惑衆及殺期親以上尊長奴婢部曲反主官人枉法受財不在赦例鰥寡孤獨不能自存者州縣量加賑濟賜天下大酺五日敢以赦前事相告言者以其罪罪之十月壬辰詔曰朕恭膺寶命握圖馭曆屬喪亂之後



承凋弊之餘弘宣德化勵精治道遐邇肅清要荒來服聊因暇務觀省民風遵彼岐梁言臻汧渭百年之老俱稱鼓腹五尺之童咸欣擊壤瞻言曩昔亟隳此地歲月踰邁以迄于茲周覽原隰悵然懷舊延問鄉黨僚吏猶存事異寃譙情均豐沛民和俗阜上下歡洽宜宣愷澤俾同慶幸可特赦岐隴二州管內自貞觀四年十月一日昧爽已前大辟罪以下悉從原免二州戶民無出一年租賦八十以上鰥寡獨疾及舊任二州雜職佐史以上賜物各有差百歲以上就加優恤行經咸陽始平武功三縣見禁之囚徒罪以上

各降一等杖罪以下并宜釋放年八十以上及鰥寡篤疾并武功縣舊軍主帥亦加賜物凡此界內名山大川望秩之禮備加牲幣孝子順孫義夫節婦隨事褒顯旌表門閭其賜物之差宜依別勅務從周厚以稱朕意乙卯又詔曰武功舊居與岐隴不異前令減罪未稱朕心其武功一縣曲赦其罪及賜帛免租賦等特宜同岐隴二州

五年五月壬午皇太子承乾疾篤請降囚徒許之

十二月癸丑降關內諸州死罪以下

八年二月己巳皇太子承乾加元服丙午降死罪以



下

九年三月壬午詔曰天地播氣垂生育之德皇王御極弘覆幬之仁故能財成萬類光宅八表朕祇奉慈訓嗣守鴻業承百王之季末屬四海之凋殘夜興夕惕無忘兆庶克已勤躬思隆政道欲使陰陽順序干戈載戢庶幾前烈致茲刑措而東山之地頻年不稔水雨爲災飢饉相屬蠢爾西戎屢擾邊境事不獲已遂勞兵車良繇誠未動天德不被物興言念此撫已多慙加以澆僞尚繁刑典仍用雖復留心聽斷明慎庶獄嘗恐縲紲之中含冤靡訴憲網所及弗辜致罪

一物有怨責深在余今歲惟暮春時屬生長宜順天布澤與物更新可大赦天下自貞觀九年三月十六日昧爽以前大辟罪已下皆赦除之其嘗赦不免者不在赦例鰥寡孱獨不能自存者所在官司量加賑恤

十一年三月幸維揚宮癸卯降維州管内繫囚見徒仍免一年租調

十二年二月甲戌幸長春宮以舊經鎮復朝邑縣無出今年租賦降囚免徒

十三年正月乙巳帝朝于獻陵是日赦三原縣及從



官衛士等大辟已下已發覺未發覺皆原其罪免其縣人一年租賦年八十已上及孝子順孫義夫節婦鰥寡憫獨有篤疾者賜物各有差宿衛陵邑中郎將衛士及三原令已下各賜爵一級

十四年正月甲寅幸魏王泰宅曲赦雍州及長安獄大辟罪已下並原之延康里百姓無出今年租

二月丁丑幸國學觀釋奠曲赦大理萬年繫囚大辟罪已下

九月癸卯以交河道行軍總管侯君集擊高昌麴文泰破之曲赦其部內大辟罪已下其佞邪之徒勸文

泰爲惡并凶逆不變抗拒官軍者不在赦例可汗浮圖城及從軍兵士非犯十惡并從赦免其士卒有父子犯罪以下罪期親犯流大功犯徒小功總麻犯杖罪悉皆放若妖言惑衆殺人官人枉法受財劫賊監治之主守自盜所監治不在赦限

十七年四月丙戌立晉王爲皇太子是日帝御承天門樓大陳使衛文武百辟列於外京邑士女重疊而觀者皇城街悉滿當道中樹金雞大赦天下罪非十惡皆赦之文武執事九品以上及五品已下子爲父後者各加一級八十已上賜以粟帛孝子順孫義夫



節婦咸表門閭鰥寡孤獨篤疾之徒量加賑給賜天下  
酺

十一月壬午詔曰朕嗣守宗祧夙夜寅懼憂勤在於  
政道撫育遍於含生十七載于茲矣上玄儲祉貞石  
表瑞朕式備禋燎躬謝蒼旻逮于儲兩亦申虔奉朔  
風旣切飛雪載零及登泰壇六合開朗神祇介福豈  
獨在予和樂之慶宜被率土可賜酺三日自漢魏已  
來或賜牛酒牛之爲用耕稼所資多有宰殺深乖惻  
隱其男子年七十已上量給酒米麵梁州管內大辟  
罪已下見禁囚皇太子慮過諸州並遣使人分往唯

十惡不在慮限餘皆量情降宥焉

二十年正月征遼還幸并州庚辰引從官及太原父  
老宴賜物有差因下詔曰太原之地興運所階全晉  
之人義深惟舊自朕恭膺寶曆二紀于茲何嘗不御  
宸長懷想峻陵之風雨臨軒遠感念大麓之雲雷當  
於此時乃忘身而拯溺寔賴同德並羸糧而樂推役  
不踰年遂清區域諒繇成都之衆謳訟關虞帝之功  
戰牧之徒歌舞興周王之業仗茲協力竟至升平懷  
彼勤勞可忘畧刻旣同垂拱之暇再省創業之方周  
歷郊原宛如疇昔訪其父老已多長謝不見所識魏



后遂以興嗟卹彼故人漢皇因而式宴前王是日哀樂交懷在朕深衷義符於此是用具陳廣樂共申高宴取譬還譙之賞同彼幸代之情仍曲赦并州管内大辟已下繫囚見徒皆赦除之常赦所不免者不在赦例

二十一年正月詔無識之徒自陷刑憲者宜順陽和特申思慮諸司見禁囚並宜將過詳其輕重自此已後每視朝錄禁囚二百人太宗親自案問降死至流流降入徒徒降入杖杖者並放

二十二年三月丁亥詔曰昔周武應天尅瑤臺而靡處漢高作極獲負陽而不居散服桃林革命先於卜雖既遷粉社創制肇于䟽龍朕御九成有乖斯義以茲撫事尤須改作何者文營仁壽繫日臨雲煬起乾陽術珠帶璧比阿房而競爽猶且有加擬傾宮而騁麗全於具體隋德云謝其徵在茲朕悼於懷爲日旣久故爲不侈義顯今辰加以心懷濟育事切於肌膚亟犯風霜疾纏於腠理每至隆曦屆序大火摘芒雖對寒泉如升頭痛之坂式居珍簞若涉炎火之林繇是岳牧憂惶公卿駭懼累陳丹懇請建山宮歷載旣深竊愛百金之費詳其至理宜順萬姓之心朕徃曷



兵凶爲黔首而忘已今茲清暑豈勞人而取安但以  
上奉宗祧下寧兆庶身非已有不可自輕敬思休攝  
之方兼理古先之道發明二指創此一宮卽潤疏隍  
憑巖構宇土無文績木不雕鏤鋪橋板以荆扉變綺  
窓於甕牖負宸恊幽貞之賞垂續嘉遁世之情振此  
冲規方垂帝範今旣成之不日賴洽普天宜順發生  
弘茲霽澤可曲赦宜君縣官及百姓并督令官人丁  
匠等大辟罪已下常赦所不免者不在赦例其營建  
當官人量加品秩及衛士以上並節級賜物先在官  
苑內住移出外者給復三年

十二月辛酉詔曰皇太子治業隆三善道兼四學惟  
忠孝是資寬仁在慮興言獄犴每切于懷以春陽方  
動請行寬宥惻隱之辭屢聞旒宸宜順其所請曲流  
恩降雍州長安萬年兩縣及諸司見禁囚徒三年以  
下差降杖罪並放免徒罪已上徵銅未輸者亦從降  
例

二十三年三月丙辰甘露降時太宗雖積疾日久喜  
見於色謂司徒長孫無忌曰今此膏澤豈朕獨喜朕  
欲共天下蒼生同茲歡慶宜卽爲赦文旦日頒示也  
辛酉百官及京邑士庶并列於顯道門外見繫囚千



餘人咸北面太宗力疾乘輿諸司庶僚百姓等車馬  
填噎顧謂長孫無忌曰百姓滋盛如此誠可哀憐朕  
方欲盡心布化令其安樂而疴瘵彌積事不遂心因  
慷慨長息泣數行下然後遣宣詔曰昔興殷解網動  
加惠於生靈惟堯肆赦播深仁於四海撫名嶽登其  
泉䟽長河揖儀鳳惟皇祚惠此爲常範朕夔越前古  
祇膺寶位雖復十角之寇久變衣冠而乃三韓之野  
尚興車甲言念艱勤無忘鑒寐兼以去冬無積獻歲  
愆陽陳尊俎於四衢免租田於百郡昔成湯七載始  
開兢惕於今三月寔懼於懷是以政令除殘商羊繼

舞昭回停詠織阿衡畢密雨高飛傾河驟瀉至誠無  
爽天意非遙宜布寰瀛同滋愷澤可大赦天下大辟  
罪已下無輕重咸赦當赦所不免者不在赦限其有  
亡官失爵宜量收叙八十已上各賜粟帛鰥寡憫獨  
及篤疾者量加賑貸

高宗以貞觀二十三年六月甲戌卽皇帝位詔曰粵  
以孤藐屬當元嗣荷構乾儀若臨冰谷思勵虛薄康  
濟元元敬順惟新仰昭先德宜布愷澤被於億兆可  
大赦天下内外文武賜勳官一級諸年八十以上賚  
以粟帛雍州及諸州比年供軍勞役尤甚之處並給



復一年

永徽元年八月庚午親慮囚徒死罪降充流流降入徒餘決杖而免之慮未盡者令太尉無忌左僕射李勣等同慮之

三年正月甲子詔曰去秋少雨冬來無雪今陽和在辰春作方始膏澤未降良疇廢業或恐獄訟之間尚有滯濫含冤未達非辜致罪百姓有過責深在予宜順彼發生申茲恩宥在京及天下囚徒死罪宜降從流流已下放免鰥寡惻獨及篤疾之徒量加賑恤務令得所

七月丁巳立陳王忠爲皇太子大赦天下五品已上子爲父後者賜勲一轉大酺五日

四年十月庚子幸温湯甲辰免新豐見禁囚

五年二月辛未帝在萬年宮詔曰恭膺寶命嗣奉遷圖居萬乘之尊當四海之責遐觀往烈詳求前古每希蹤於哲后常勞心於庶務兢懼弗寧憂勤若厲屬天下無事區宇有截仰高風於汾射暫清暑於林泉朕昔在震宮侍遊茲壤山川如舊歲月不追今旣俗阜年和華夷胥悅緬懷徽範情兼感慰宜遵省方之義且順陽和之序曲申惠澤式彰寬宥行幸所經諸



縣及岐州囚徒行人犯罪者流降徒徒已下並免之  
 六年正月壬辰親謁昭陵還行宮詔曰朕躬膺大寶  
 嗣隆景業虔奉成則光闡洪猷昧旦兢懷分宵動慮  
 蒼昊垂祐宗社降靈順黎元之心藉忠賢之力俗登  
 仁壽道暨升平遠肅邇安時康俗阜履端受節陽和  
 肇氣親率庶寮奉詣陵寢遺弓永慕切終身之憂撫  
 鏡纏悲興寒泉之思敬深如在哀隆罔極荐享既畢  
 精禮獲申式表因心宜弘愷澤可曲赦醴泉縣并行  
 從人大辟罪已下皆赦除之百姓宜免今年租調右  
 監門員外將軍嘗基在此宿衛進爵一等陵令陵丞  
 各加一階并節級賜物

二月乙巳皇太子忠加元服詔大辟已下罪并降一  
 等杖者悉原之

十月乙卯詔立武氏為皇后令來月一日備禮冊拜  
 丁巳大赦天下流人達前所放還緣王柳蕭等家

若等曰王皇后等并舅家柳氏及蕭淑妃家也配流者不在此限八十已上

老人各賜粟二石綵三段百歲已上各賜粟五石綵  
 十段孝子順孫義夫節婦咸表門閭鰥寡憚獨篤疾  
 之徒不能自存者量加賑恤

顯慶元年正月辛未立代王弘為皇太子壬申大赦



天下改永徽七年為顯慶元年文武職事九品以上及五品以上子為父後者各加勳一轉亡官失爵並宜量叙諸年八十以上各賜粟帛其有孝子順孫義夫節婦咸表門閭鰥寡惇獨篤疾之徒不能自存者量加賑恤賜天下大酺三日

二年二月幸雒陽宮辛酉詔雒州管內并行從者大辟已下並降一等死罪徒流已下悉原之雒州百姓免一年租調

十月幸鄭州壬子次汜水頓曲赦鄭州管內三年二月甲戌自東都還戊寅錄京城囚徒悉原宥

之

四年十月皇太子弘加元服大赦天下文武官職五品以上子孫為父祖後者各加勳官一級大酺三日五年二月丙戌帝在并州曲赦并州管內及所經州縣義旗初職事五品已上身亡歿墳墓在州者令所司致祭佐命功臣子孫及大將軍府佐以上見今在者賜階級有差

八月癸未以蘇定方等討平百濟曲赦神丘道行軍大總管以下兵士及其父母妻子大辟罪已下賜天下大酺三日



顯慶六年爲龍朔元年曲赦雒州境內

二年七月戊子朔以皇子旭輪滿月大赦天下大辟罪已下無輕重悉原之賜酺三日

三年十二月庚子詔以絳州麟見於介山含元殿前銀臺閣內並覩麟迹改來年正月爲麟德元年在京雍州諸縣見繫囚徒各降一等杖罪以下並免之

麟德元年八月己卯降萬年縣囚徒流罪從徒徒從杖杖已下并宥之

二年四月壬午以蠻獠平曲赦桂廣黔三府管內

乾封元年正月戊辰朔有事於泰山壬辰御朝觀壇受朝賀大赦天下改麟德三年爲乾封元年諸行從文武官及見朝覲岳牧二京留守并邊要州都督刺史三品以下並賜爵一等四品已上加授一階諸老人年八十已上者版授刺史司馬縣令婦人版授郡縣君並節級量賜粟帛天下百姓年二十一已上八十以下賜爵一級車駕所經州給復一年齊州停日稍久給復一年半兗州管嶽給復二年通租懸調欠貸官物並宜免徵孝子順孫義夫節婦表其門閭終身勿事率土之內賜酺七日



總章元年三月庚寅詔曰朕以寡薄忝承丕緒奉二聖之遺訓跨億兆以初臨馭朽兢懷推溝在念而上玄垂祐宗社降休歲稔時和人殷俗阜車書混一文軌大同簡玉泥金升中告禪百蠻執贄萬國來庭朝野歡娛華夷胥悅但爲郊禋嚴配未安太室布政敷化猶闕合官朕所以日昃忘疲中宵輟寢討論墳籍錯綜群言採三代之精微探九皇之至順斟酌前載製造明堂棟宇方圓之規雖兼古實肆筵陳俎之法獨運財成宣諸內外博考詳求度其長短興廣聞見而鴻生碩儒俱稱盡善宜命有司及時赴作務從祈

中稱朕意焉今陽和在辰景風扇物昆蟲草木有以自康朕之百姓尚多勞止思覃惠澤與其更新可大赦天下改乾封二年爲總章元年大辟罪以下皆赦除之

二年九月己亥帝自九成宮還京師乙巳至岐州以高祖初仕隋爲扶風太守故曲赦岐州管內

咸亨元年三月甲戌朔以京師旱大赦天下改總章三年爲咸亨元年

四年十月己未帝在九成宮以皇太子納妃裴氏禮畢曲赦岐州



上元元年八月壬辰追尊祖宗謚號改咸亨五年爲上元元年大赦天下長流人并放還五品以上各舉所知大酺三日

二年六月立雍王賢爲皇太子大赦天下

三年二月丁亥帝幸汝州之温湯令御史中丞杜文範慮汝州囚徒罪輕者皆免之

儀鳳元年十一月壬申以陳州上言鳳凰見於宛丘縣改上元三年爲儀鳳元年大赦天下

三年四月丁亥朔以旱親慮市城繫囚悉原宥之戊申大赦天下

調露元年六月辛亥大赦天下改儀鳳四年爲調露元年

永隆元年八月乙丑立左衛大將軍雍州牧莫王哲爲皇太子改調露二年爲永隆元年大赦天下大酺三日

二年七月以太平公主出降曲赦京城囚徒大辟罪已下

開耀元年十月壬辰裴行儉等獻定襄所獲俘囚乙丑改永隆二年爲開耀元年曲赦定襄軍及諸道緣征單于突厥官吏兵募等



承淳元年二月癸未以皇太子誕皇孫滿月大赦天下改開耀二年爲承淳元年大酺三日

二年九月己丑以皇女太平公主誕育曲赦東郡都城內

弘道元年十二月丁巳詔曰朕以寡昧謬膺丕緒未嘗不孜孜訪道戰戰臨人馭朽懷秋駕之危負重積春冰之懼日慎一日三十四載於今矣何則足寒傷心人勞傷國下安卽上逸時弊卽君憂所以身處九重而情周萬姓建本之懷遽切抑末之念逾深今雖庶績已寧淳源未洽履素歸厚者遂寂寥而靡聞狗

華趨利者尚馳騫而不息顧以薄德有謝移風永念群方在予多愧况朕之縣系兆自玄元固當遠協先規光宣道化變率土於壽域濟含生於福林屬想華胥載勞寤寐所冀內外寮案各竭乃誠敦惟黎民俱崇簡質善染薄俗咸與惟新憑大道而開元共普天而更始宜更申霈澤廣被絃誦可改承淳二年爲弘道元年大赦前後責情流人並放還老人年百歲以上者版授下州刺史婦人版授郡君九十已上者版授上州司馬婦人版授縣君八十已上者版授縣令并婦人并節級量賜粟帛孝子順孫義夫節婦表其



門閭終身勿事鰥寡惇獨篤疾不能自存者量加賑恤仍天下諸州置道士觀上州三所中州二所下州一所每觀各度七人又比來天后事條深有益於政言近而意遠事小而功多務令崇用式遵無怠見任內外官五品以上經四考及守五考經三考六品以下計滿三考政有清勤狀無私犯者各加一階中宗神龍元年正月乙亥卽位大赦天下唯張易之黨不在原限其周興等所枉破家人子女已進宮及配沒者賜爵一級東宮官寮見任六品加官計階應入五品者特令不拘年限諸州百姓免今年租稅天

下宗姓普准舊式房州百姓三年給復於是天下大悅是月甲子立妃常氏爲皇后大赦天下內外官預陪位者賜勳一轉大酺三日

三月甲申朔文明以來被破家人特從放免所有子孫並還其資蔭其揚州構逆黨唯徐敬業一房及裴炎不在免限餘并原宥

九月壬午親祀昊天上帝土皇地祇于明堂禮畢制曰朕聞唯天爲大所以上序三宗唯帝爲尊于是宏開七廟故知肇興衢室爰申宗祀之規爲建明堂或廣巖禋之禮莫不入窻四達分氣候於炎涼複廟重



曆定尊卑於昭穆實爲國之洪訓乃經邦之茂典我  
國家睿祖神宗重光累葉道軌義農之上功侔造化  
之初冠今昔而居尊掩寰區而作大朕承撫天運繼  
聖開元披鳳曆而乘時握龍圖而建極春秋變易每  
增霜露之心日月推移倍切蒸嘗之思然而城臨丹  
鳳清廟久安水控玄龜神基未立金輿往幸空展望  
於瑤祠玉輦來巡實幸親於碣石三川帝里入水皇  
州豈都邑之相誇而郊畿之有謝所以交風與壤還  
開候雁之庭睽日明區更置馴龍之室巍巍紫座無  
虧薦鮪之途奕奕彤宮遂得獻羔之所加以總章露

闢重屋煙披懸晦日于梅梁掛晴虹于桂棟是以用  
斯珪璧奠彼牲牢唱孤竹之簫管奏空桑之琴瑟爰  
於祈享之日乃至禋宗之辰景色殊常烟雲冠古或  
凱風南至縈喜氣而分輝或驟雨東來引祥雲而合嚮  
固可以作樂崇德殷薦上帝而璧海遙澄覺三邊之  
霧捲丹霄上廓看九野之塵清祖宗之靈貺昭然宇  
宙之神心可見虔誠旣展盛禮斯弘宜覃作解之恩  
以廣奉先之德但赦者小利而大害始泰而終否著  
小人之幸非君子之幸今歲已來頻敷渥命徒長僥  
倖逾犯憲章非所以弘獎風猷發揮明教深慮無知



者因茲獲罪有識者緣此致譏遐思管仲之篇緬想  
吳漢之說恐負丕構慨然長想昔孔明相蜀王猛佐  
秦咸以數赦爲言俱稱肆眚非便朕惟新闡政方事  
澄源期望古而裁規具脩今而布澤伏以禮申崇禎  
情展泰禋式流曠蕩之恩兼明懲勸之道可大赦維  
州境內天下諸州見禁囚徒罪應至死者特宜免死  
配流者入徒餘并原宥京文武三品以上賜爵一級  
四品以上各加一階外文武官九品以上賜爵一轉  
皇親嗣王仍特許珮金魚袋內外職事官三品以上  
及四品清官并中書門下五品官父已亡者並量加

追贈如聞天下諸官皆盡化胡之變諸寺亦盡老君  
之形一種尊容兩俱不可限制到後十日並除却若  
有故留者卽科違勅罪其化胡經先有明勅禁斷如  
聞在外仍頗流行自今諸部化胡經事及餘凡說化  
胡事處並宜除削在外百姓婚娶之家百兩未行二  
親俄殯停哀之際便卽成婚遂輟苴經之容敢申花  
鬻之禮寧戚之心安寄罔極之志闕如敗俗傷風莫  
過於此自今已後宜卽懲革自弘道以前經任相三  
年以上及秦府晉府寮佐四品以上并食實封功臣  
雖經罪責不至破家子孫無任京官者特宜優與一官



英府周府舊寮五品已上子孫亦宜准此天下百姓  
爲父後者各賜古爵一級大酺三日

十一月壬午親謁太廟告謝受尊號之意禮畢大赦  
天下前後流人非反逆緣坐者並放還緣張易之徒  
黨本犯配流者量輕重與遠官京官文武官及朝集  
士九品已上加一等三品以上賜爵一等外官九品  
已上賜勳一轉安國相王諱鎮太平公主並加實封  
通前萬戶天下賜酺二日

二年十月戊戌自東都還十一月乙巳大赦天下從  
行文武官九品已下賜勳一轉

三年四月庚寅幸薦福寺曲赦雍州其故吏周府官  
從至寺者各賜勳一轉

七月辛丑太子重俊與成王千里舉兵誅武三思癸  
卯以重俊等旣就誅夷大赦天下成王千里等親黨  
不在原限

景龍元年九月庚子御太極殿受神龍皇帝尊號禮  
畢大赦天下改元景龍文武官三品已上賜勳一轉  
二年二月庚寅順天皇后言衣箱中裙上有五色雲  
起久而方歇帝令畫工圖其狀以示百寮乃大赦天  
下內外五品已上官母妻各加邑號一等



十一月己卯安樂公主降武延秀禮畢大赦天下賜  
酺三日

三年十一月己丑親祀南郊禮畢大赦天下繫囚見  
徒及十惡咸赦除之親祀流人並放還京文武官及  
應集考使別赦陪位官邊州都督刺史諸軍大使副  
三品已上賜爵一等四品已上加一階應入三品者  
三品減四考五品減三考聽入外文武官賜勳一轉  
舉堪刺關內諸州無出今年地稅令內五品已上各  
舉堪史縣令者天下大酺三日

十二年甲午幸新豐溫湯甲辰曲赦新豐縣大辟已

下

四年二月壬午以金城公主出降吐蕃帝幸始平縣  
送之壬午曲赦始平縣大辟罪已下百姓復給一年  
少帝溫王唐隆元年六月庚子臨淄郡王平肅庶人  
辛丑詔曰大盜移國朝有賊臣見危授命家多義上  
朕以凶閔觸諸糜潰姦豎構扇傾陷宗社潛圖竊發  
機兆未萌相王第三子臨淄郡王隆基糾合同盟忠  
勇奮怒志除兇黨保護邦家逆賊肅溫馬秦客葉靜  
能宗楚客紀處訥武延秀趙履溫楊筠等密行鴆毒  
先聖暴終朕志不圖全枕戈泣血風雲玄感情計陰



通太平公主男衛尉卿薛崇暕與前同州朝邑縣尉  
劉幽求摠監鍾紹宗日夜共謀誓誅逆黨兇徒驚慙  
投竄無所今天衢交泰氛祲清宜申作解之恩以  
洽升平之化自唐隆元年六月二十一日昧爽已前  
大辟罪以下常赦所不免者咸赦除之其逆賊頭首  
咸已斬決自餘支黨一無所問內外官三品以上賜  
爵一等四品已下加一階隆基可封平王食實封一  
千戶賜物五千段薛崇暕封立節郡王食實封五百  
戶賜物三千段鍾紹宗可銀青光祿大夫守中書侍  
郎穎州郡開國公食實封二百戶賜物一千段前同

州朝邑縣尉劉幽求可朝議大夫守中書舍人仍參  
知機務中山郡開國男食實封二百戶利仁府折衝  
麻嗣宗可雲麾將軍行左金吾衛中郎將賜物一千  
段追貶皇后常氏爲庶人安樂公主爲悖逆庶人  
唐宗以唐隆元年六月甲辰卽位大赦天下自唐隆  
元年六月二十四日辰時已前大辟罪已下咸赦除  
之內外官三品已上各加爵一等四品已下各加一  
階內外職事官五品已上各舉所知一人諸道征鎮  
人家令州縣簡較

景雲元年七月七日平王爲皇太子大赦天下制曰



天下公器非上聖無以運其機域中大業非元良無以固其本朕欽若靈命寅奉神宗屈已順人用安四海承祧主鬯實貞萬國頃者家臻大憫在疚惟憂臯鏡滿朝豺狼塞路武職戎政必任凶徒國要時權咸升逆黨社稷之守望絕苞桑忠義之懷惟其艾棘階禍稔惡伺隙乘間煩言碎辭所不勝述皇太子正氣凝姿端命敏德自家刑國英徽日湛移孝爲忠雄謀電發北宮馳入掃摯捨於紫衢南宮反正開日月於黃道平亂寧夏翼戴朕躬一旅不勞功逾復禹百神咸舉事邈興周聲應吹銅望惟當璧今遣司空讀册

命侍中授璽寶由立義豈曰尚親承華肇開元嗣以建宜申滂雷之澤仍紀景雲之瑞可大赦天下改唐隆元年爲景雲元年自七月二十日昧爽以前大辟罪已下咸赦除之其犯十惡常赦所不免者不在赦限內外文武官九品已上子爲父後者賜勳一轉公卿各舉孝友忠正堪任東宮官一人自神龍以來直諫枉遭非命咸令封植其墓十一月葬中宗于定陵曲赦萬年高陵三原華原富平等縣自景雲元年十一月二十一日昧爽已前大辟罪已下咸赦除之常赦不免不在赦例



二年四月壬寅大赦天下繫囚見徒流移未達前所及已到流所者皆赦之京官四品以下加一階外官賜勲一轉三品以上各賜一爵天下濫度僧尼道士女冠等先經度者並令依舊諸州廢寺觀并依舊名置立

八月乙卯以高祖舊宅有柿樹天授中已經枯死至是重生因而大赦天下謀殺人造僞頭首者并免死配流嶺南官典取受者特免放

延和元年五月戊寅有事於北郊辛巳大赦天下改太極元年爲延和元年五月十二日昧爽以前大辟

罪已下咸赦除之其十惡及劉誠之胡大宰徒侶并不在赦限文武官預大禮各賜勲一轉天下大酺五日

先天元年八月甲辰傳位於皇太子帝稱太上皇大赦天下改元先天自先天元年八月七日大辟罪已下咸赦除之其常赦不免者不在赦限

二年三月太上皇詔曰恤刑緩獄古之通義務本勸農國之常典今陽和布氣膏澤順時凡厥黎民咸事東作而疲人嬰法自滯圜扉言念於此有軫于懷宜從寬宥使營稼穡其京城內見禁囚除死罪以外並



特放免營農天下諸州亦宜准此  
七月甲子左僕射竇懷貞等與太平公主謀逆事覺  
伏誅是日太上皇御承天門樓下詔曰天步時艱王  
業多難亂常干紀何代無之我國家累聖膺期重光  
繼統戎蠻慕義遐邇無虞朕以寡昧嗣守丕祚嚮明  
而理曷景忘劬冀寓內之小康庶群生之遂性又使  
家知禮讓人盡忠良不謂姦宄潛謀蕭牆作釁逆賊  
竇懷貞蕭至忠岑羲薛稷李慈李猷常元楷唐駿唐  
昕李晉李欽賈應福傅孝忠僧惠範等咸以庸微謬  
承恩幸未申毫髮之效遂興梟獍之心共舉北軍突

入中禁將欲廢朕及皇帝以行篡逆朕今皇帝率衆  
討除應時殄盡元惡既戮姦黨畢殲宗社又安人神  
胥悅務申寬大之典宜覃肆宥之恩可大赦天下自  
大辟罪已下無輕重咸赦除之其逆人魁首未捉獲  
及應緣坐者並不在赦限自餘黨類往還一無所問  
布告遐邇咸使知聞

冊府元龜

冊府元龜

帝王部

卷之八十四



冊府元龜

淮南李嗣京奏闕

西極文翔鳳訂正

豫章黃國璠較釋

帝王部 八十五

赦宥第四

唐玄宗先天元年十月庚子謁太廟禮畢御延喜門  
下制大赦天下

開元元年三月丁卯御承天門樓下制曰朕承累聖  
之鴻源荷重光之積慶昔因多難時屬遘屯寶位深



墜地之危神器有綴旒之懼事殷家國義感人祇吟  
嘯風雲恭行雷電致君親於堯舜濟黎庶於休和遂  
以孟秋允升儲貳旋承內禪繼體宸居拜首之請空  
勤讓王之誠莫展恭臨億兆二載于茲上稟聖謨下  
凝庶績大荒同軌瀛海無波不謂姦慝潛謀蕭牆竊  
發逆賊竇懷貞等頃以庸妄擢居台庭毫髮之效未  
申丘山之釁仍積共成梟獍將肆姦回太上皇聖斷  
宏通英謀獨運命朕率岐王範薛王業等躬事誅鋤  
齊斧一麾凶渠盡殪太陽朗曜澄氣霽於天衢高風  
順時厲肅殺於秋序人靈叶贊夷夏相歡四族之愿

既清七百之祥方永爰承後命載闡休期慈澤之  
大猷施雲雨之鴻澤承乾之道既光被於無垠作解  
之恩思式覃於品物當與億兆同此維新可大赦天  
下大辟罪已下咸赦除之邠王守禮加實封二千戶  
宋王成器申王成業各加實封一千戶岐王範薛王  
業各加七百戶文武官三品以上賜爵一級四品以  
下各加一階內外官人被諸道按察使及御史所通  
惡狀咸宜洗滌選日依資叙用十二月庚寅大赦天  
下改元爲開元

二年六月甲子制曰朕聞養人者謂之司牧非逸於



人上事天者謂之帝王蓋御於天下故作爲棟宇以避燥濕居於臺榭以順高明斯乃奉時令布朝政也朕以不德祗膺睿圖寶十家之產愛兆人之力未嘗與工於土木役思於池籞異之休艾以致邕熙自律應長羸時方大暑溽雲屢起溫風且至伏以太上皇宴居保衛滌慮清閒迹不往于甘泉心每期於汾水朕侍於左右以奉晨夕助玄默之化則虧於聽理當炎蒸之序又瀆以囂煩惕焉載懷感忘順色然大明創兆先聖所營卽舊不如因時而往千門萬戶外雖謂於別宮一日三朝中自連於複道下所以寧問安

之懇上所以資習靜之娛實獲我心俾康政理古有服珍裘者則念人之寒居夏屋者則念人之熱况此歲阻飢甫田不稔或愚人陷罪園土稱寃凡厥庶僚將何以恤兩京及諸州宜令長官親理寃獄除犯名教及官典犯賊并緣妖僞以外餘罪徒以下咸宜放免其有茂才異等拔萃超群緣無紹介久不聞達者咸令自舉朕當親問其應宣撫使各聞舉人試第四等須准舊例別加優獎見任人各量與改轉前資常選人至冬依選例處分其未出身者兼授散官先天以來軍將押衛官等在陣戰亡者令本軍勘實奏聞



其說災祥誑惑閭里并令州縣長官等嚴加捉搦仍令御史訪察繩糾有能直言極諫補朕之闕者各封狀進朕將親覽如有可採當加獎擢其皇親諸親及東宮丞優任員外簡較試等官近停令至冬處分者有家道貧迫情愿外任者亦令所司勘實量才注擬其緣坐流人處置有輕重不類者令所司勘會奏聞三年正月丁酉冊郢王嗣謙爲皇太子因下詔降見禁囚徒死罪者免死徒流已下罪悉原宥之

二月辛酉制曰青春式序陽和布氣萬物熙熙莫不遂其性而嘉其生也申念愚人干我王度日陷坑穽寘之網羅朕代天理物爲人父母眷言囚繫良增隱惻豈憲章之尚密將教道之不明歟順時行令抑惟常典兩京及天下見禁囚除犯惡逆造僞以外決一百配流嶺南嶺石諸州其餘一切放免

五月丁未命宰臣親行京城諸獄省察囚徒下詔曰惟刑恤哉古之道也朕撫臨四海茂育兆人思致淳風登之壽域期盡冠而不犯故開羅而在宥念茲下愚自抵常法時屬盛夏天其養生在物最靈惟人爲貴朕處臺榭猶有鬱蒸之毒彼居囹圄能無憺怛之憂故令宰臣備加案察省覽所奏用憫于懷爰矜可



恕之罪必務惟輕之義將布寬惠俾從原減應合書  
罪者宜遞降一等論

十月癸亥詔巡遊所過之縣見禁囚徒以下減放免  
流以上罪具犯狀奏聽進止戊辰大理具囚名奏帝  
覽之以所犯重者降一等輕者並釋放下詔曰朕祇  
膺鴻圖嗣守丕業何曾不馭朽增惕納隍在慮六合  
之內每勤祇綏五刑之屬尤用欽慎然簡書多窒惕  
之訟園扉有幽滯之人淹恤逾時羈縲相對頗異哀  
矜之義實慙恢踈之網雖刑政之典彼則自貽而在  
予之責終以多愧其大理禁囚前令詳覆者宜按所

犯輕者並放重降一等仍依令式處分十二月有司  
所奏往幸鳳泉所過之縣流以上囚奏聽進止者凡  
稱原減頗詳故事罪至死刑寬其大戮况聽成有法  
閱實無冤屬陽和上春積雪未降天地之於庶物正  
亭之而毒之皇王之撫兆人寧以殺而止殺申念重  
辟惻然疚懷特布湛恩助茲生氣其犯斯刑者宜減  
一百配流遠惡處其犯杖配流者宜免杖依前配流  
已決及流三千里者節級稍移近處二千五百里以  
下並宜配徒以殿

臣欽若等曰殿  
謂自遠而近也

五年二月甲戌行幸至東都大赦天下唯謀反大逆



册府元龜 赦宥四  
不在赦限餘並宥之河南府百姓給復一年河南北  
遭滂及蝗虫處無出今年租武德貞觀以來勲臣子  
孫無在位者詳求其後奏聞有嘉遜逃棲養高不仕  
者州牧各以名聞

八年九月丙寅制曰五刑之用以禁奸慝三宥之設  
以矜愚耄朕永康四海憂在兆人俾臻大化爰措庶  
獄而愚妄之色抵犯或聞向隅可哀當宁興軫今天  
地旣肅申嚴在命時分其令罪則無留載懷幽犴思  
布生德宜崇減死之恩式明宥過之典其京城內犯  
罪人等時令按覆其中造僞頭首及謀殺人斷死者

決一百配流嶺南惡處斷死者決一頓免死配流遠  
處雜犯流移者各減一等杖罪已下並免

九年五月庚午詔曰自昔明王恤人爲念朕君臨寓  
縣子育黎蒸一物乖宜常切納隍之慮萬方有罪再  
軫泣辜之責故勸農務穡國政攸先捨過錄功帝圖  
惟永况麥風炎序梅律敲辰言念狴牢情深惻隱宜  
申緩獄之令以布宥刑之澤其天下見禁囚徒犯流  
已下徒已上特宜免以嘗科並遣隨軍展效仍令所  
司明爲年限條例隨便近諸軍分配異能竭力勉楹  
勲庸其杖已下卽令釋放使務農業



十一月庚午大赦天下內外官九品以上加一階五品已上加爵一等自六月二十日七月三日

臣欽若等曰

宗景隆元年六月三日平常庶人扶衛社稷食實封

功臣坐事削除勲封官爵中間有先死者並量加收贈致仕官合佩魚者聽其終身大酺三日

十一年丁卯敕曰獻歲肇春陽和感氣且是發生之日寔惟布德之辰朕將幸秦京言離雒邑既省方以觀俗思弘恩以濟人載念徃牢又惻襟抱宜敷寬大之典用敦祝泣之意都城內見禁囚徒除犯十惡及造偽頭首餘雜犯流死等各減一等徒以下並放是

月已巳鑿輿發東都北巡狩下制曰朕爰自灑祥有事省方乘發生之和因豫動之慶將欲恤鰥寡問老疾陳詩展禮黜幽陟明使滯伏必申微物咸遂其行幸所至處宜令刺史縣令存問百年老病鰥寡孀獨及行人家如有單貧不濟不能存活者量加賑給其侍老仍各賜物三段見禁囚徒除十惡及身犯反逆并造偽頭首以外自餘雜犯流死等罪各減一等徒以下放免百姓有賢良官人有清白並令中書門下採訪名聞其貪濁之吏委御史覺察彈奏庚辰幸雒州曲赦大辟已下給復五年是月癸巳帝車駕在并



州勅曰朕躬承寶位十有餘年荷累聖之昌圖膺三靈之睠命日慎一日雖休勿休今省俗觀風肆覲群后陳詩納賈親問百年雖念勞人事資展禮太原舊國王業所興乃眷成周西巡豐鎬因惟嗣漢東至沛鄉皆會彼舊都眷茲粉社况興王始封之地鴻圖創業之初含育生靈大造區宇永惟丕構顧慙貽厥且稱用武戎役是殷宜錫懷舊之恩以順發生之澤太原府境內見禁囚徒除十惡及造僞頭首餘並放免預宴官共賜物二千疋父老及吏人等共賜物一萬疋百姓宜給復一年九等戶給復三年元從家給復

五年其家籍見在終身免征役侍老年八十已上賜物五段版授上縣令仍賜緋婦人版授上縣君九十已上賜物七段版授上州長吏仍賜緋婦人版授郡君百歲已上賜物十段版授上州刺史仍賜紫婦人版授郡夫人孝子順孫義夫節婦旌表門閭終身勿事其有沉淪草澤抱德栖遲及武德功臣子孫并元從子孫才堪文武並委府縣搜揚具以名薦十一月戊寅親祀南郊大赦天下制曰朕獲主三靈于今一紀聽政中昃每不敢康觀書乙夜將求諸道而頃年以來爲理思至或遠人不率或嗣歲不登淳



朴未還惕厲斯在爲人上而慙德奉天明以畏威祝  
史正詞必期於陳信郊丘備禮將俟於升平今宗廟  
降靈克開厥後乾坤交泰保合太和麟鳳龜龍玄符  
黃瑞之祉蠻夷戎狄梯山航海之琛孰不日月以聞  
道路相屬顧惟不德當茲休運欽若昭報疇咨故實  
所以今年獻春恭祠后土季秋吉日追崇九廟採必  
先於曾經稽肆類於虞典爰因長至欽謁上玄告受  
命之元符昭嚴配之成績大典云備至誠克展諸侯  
駿奔來於穆之相百神受職率咸秩之文六變已陳  
三獻斯畢蓋春秋大事莫先乎祀王者盛禮莫重於  
郊而柴燎克終感慶罔極豈予一人之福亦爾萬邦  
之賴宜用咸和之祭俾承厚下之澤可大赦天下自  
開元十一年十一月十六日昧爽以前罪無輕重已  
發覺未發覺已結正未結正繫囚見徒大辟罪已下  
咸赦除之其十惡死罪造僞頭首劫賊殺財主不在  
赦例就中仍慮有寃濫者所司具狀送中書門下盡  
理詳覆奏聞朕將親覽升壇行事官及供奉官三品  
已上賜爵一級四品已下加一階内外文武官及致  
任并前資陪位者賜勳一轉親王公主各與一子官  
凡諸軍節度大使及三都留守不備位委寄旣重特



宜同陞壇官例百歲老人賜帛五段粟五碩縣令至其家存問給付孝子順孫義夫節婦旌表門閭終身勿事諸州百姓或有因逢水旱流寓未安者宜令所司與朝集使卽作賑恤安輯法奏聞征行人家州縣簡較勿令侵欺鰥寡孀獨州縣矜恤使得存濟元置義倉救人不足承前貸百姓糧及種子未納者並免不須却徵自古聖帝明王忠臣烈士名山大川并令所管致祭其左貶官非逆人五服內親及犯贓賄名教者所司勘實奏聞量移近處其人清白政術堪任刺史縣令及抱器懷才不求聞達者長官具以名

薦宗室中有孝悌才行爲衆所知仍在卑任者委宗正具以名奏君臣一體休戚共焉朕承天命傳大寶蓋憑累祖餘業得一之符亦繇群公舊勳不二之力永言繫賴其敢忘之自武德以來實封功臣知政宰輔有身無大故而亡官失封子孫淪屈者所司勘實具以狀聞存者可酬其官榮逝者當錄其裔嗣使幽冥同慶知有今辰亞獻郊王守禮終獻寧王憲各賜物一千疋侍中源乾曜中書令張說兵部尚書同中書門下三品王峻各賜物五百疋二王後賜物一百疋二品三品八十疋四品五品六十疋六品七品四



十疋八品九品三十疋郡主縣主各賜物八十疋天下賜酺三日京城五日

十三年正月戊子制曰惟刑是恤止殺之深仁寧失不經好生之大德朕恭膺丕業思濟元元下之陷辜上教不至在予之責何咎于人今履端肇序陽和獻歲思布德澤惠此囹圄將弘愷悌之恩以順發生之氣其天下見禁囚徒死罪宜降至流流已下罪悉原之郤城內委中書門下當日疏決處分京城委留守制到日處分仍令中丞蔣欽緒往河南大理少卿明珪往關內刑部郎中張懌往河東水部郎中崔恂往

山南東道右庶子高仲舒往江南西道職方郎中鄭績往劍南道秘書丞張履氷往淮南道殿中侍御史孫濟往隴右道贊善大夫張景幽往河西道右諭德李林甫往山南道主客郎中張烈往江南東道並卽馳驛發遣所至之處疏決囚徒宣慰百姓其有窮乏交不存濟及侍老行人之家有疾苦者各令州縣量加醫療及賑恤其嶺南五府磧西四鎮非流配効力等見禁囚徒各委節度使及本管都督府處分布告遐邇知朕意焉

十一月壬辰以封禪禮畢御朝觀壇一曠殿朝群臣



大赦天下制曰朕聞天監爲后斥克奉天飢念德以受命亦推功而復始厥初作者七十一二君道洽跡著時至符出皆用事於介丘升中於上帝人神之望蓋有以塞之皇王之序可得而言之朕接統千歲承光五業惟祖宗之德在人惟天地之靈作主往有內難幽贊而積大勲間無外虞守成而續舊服未嘗不乾乾終日思與公卿大夫上下叶心聿求至理以弘我列聖其庶乎馨香今九有大寧群萌樂業時必敬受而不奪物亦順成而無天懋建皇極幸致太和洎乃幽遐率繇感被戎狄不至唯文告而來庭麟鳳已臻

將覺悟而在藪以故凡百執事亟言大封顧惟不德初欲勿議伏以先聖儲祉與天同功荷傳慶以在今敢侑神而無報大節斯在朕何讓焉遂奉遵高宗之舊憲章乾封之典時邁東出柴告岱嶽精意上達盼蜚來應信宿行事雲物呈祥登降之禮斯畢嚴配之誠獲展百神群望莫不懷柔四方諸侯莫不來慶斯天下之介福也邦家之耿光也無窮之休祉豈獨在予非常之惠澤宜其逮下可大赦天下自開元十三年十一月十日昧爽已前大辟罪已下罪無輕重已發覺未發覺已結正未結正見禁囚徒咸赦除之唯



十惡死罪不在此例流人未達前所者放還內外文武官三品以上賜爵一等四品已下賜一階郊王守禮寧王範薛王業各與一子三品官公主嗣王郡王縣主各與一子官其應行從文武官加階之外並賜勳兩轉孔子從褒聖侯優與處分天下致仕官各依本品賜一季祿及束帛諸蕃侯王首來會禮者各加一官其行幸州縣供頓劬勞百姓並免一年租賦兗州免二年租賦朕永惟王業繫賴舊勳元首股肱其猶一體自武德以來功臣宰輔或各存王府遺嗣沉淪或身無大故術屈泉壤宜令所司訪擇申理唐元

立功官人往屬艱難能盡忠義今成大禮何日忘之宜各與一子出身朕躬步天門宿齋日觀時屬嚴冬雪後初夜風寒朕因露立祈恩誓欲代人當咎俯仰之際頓息霜飈奠獻之晨變同韶景誠荷上天垂祐亦賴靈山吐祥詩云無德不報宜封泰山神爲天齊王禮秩加三公一等宜令所管崇飭祠廟去山十里禁其樵採給近山二十戶以奉神祀天下賜酺七日十五年七月已亥降都城繫死囚及流罪各減一等徒已下罪悉免之

八月已巳制曰朕作人父母爲天下君豈將巖廊爲



刑房元集 卷之八十五

逸嘗以億兆為念何嘗不養之如子視之如傷驅彼  
代俗躋之仁壽使勝殘之道自我王政好生之德洽  
于人心皆遷善以遠罪亦有耻而且格靡然向風以  
致刑措今秋典戒令理官議獄愍此愚者猶聞抵冒  
當宁發想興言疚懷宜布惠和之澤用伸矜降之典  
俾率土之內知朕意焉天下見禁囚犯死罪者特宜  
免死配流者配邊州效力徒已下罪並放免官人犯  
贓罪不在此例其未有斷給者各處本犯定刑名准  
此處分

十六年三月辛丑制曰頃屬初陽肇授移輦新宮因

施惠布德用順時令徒已下罪並責保放營農今詳  
其刑格亦非重罰已釋囹圄不可更收宜許自新特  
從免放

九月丙午以久雨思宥罪緩刑乃下詔曰古之善為  
邦者重人之命執法之中所以和氣洽嘉生茂今秋  
京城連雨隔月恐耗其稟粒而害于粢盛抑朕之不  
明何政之闕也永惟久雨者陰氣凌陽寃塞不暢之  
所致也持獄之吏不有資性生於刻薄輕重出於愛  
憎邪詩曰此宜無罪汝反收之刺壞法也書曰與其  
殺不辜寧失不經明慎刑也好生之德可不務乎爾

冊府元龜 帝王部 卷之八十五 十四



京及諸州繫囚應推徒已下罪并宜釋放降死罪及流各一等庶得解吾人之愠結迎上天之福佑布告遐邇知朕意焉

十七年四月癸亥制天下繫囚死罪減等餘並宥之十一月丙申謁橋陵以奉先縣爲赤縣曲赦縣內大辟罪已下戊申謁諸陵還大赦天下制曰祀之大者莫尊於嚴享德之至者莫加於孝敬故周廟頌思文之章漢陵躬展事之禮因心斯在敢不肅祇我國家應天受期駿惠丕命繼武宗文之德重熙累洽之盛故以道高系表首冠帝先朕以眇身獲保鴻業往屬

多難時逢國屯推戴神宗纂復興運允迪前烈載康兆民此蓋伏鄉士之謀叶人祗之贊豈伊薄德敢承天休露往霜來久積園陵之思秋嘗夏禘聿思孝饗之誠乃夏朔辰祥芝產於太室及秋吉日珎木瑞於神宮對越上靈拜茲嘉貺頤以秋稼未實民役尚勞每事害農豈惟在予有咎之責因親設教恐違先旨恤隱之方今三時已和百禮斯洽崇樂宿設萬舞在庭敬爾臣工駿奔執豆蠲絜爲禋明德惟馨有來雍雍載懷怵惕之思至止肅肅如聞歎息之聲降格有終纏感罔極瞻弓劍而莫及捧鏡奩而哽咽始自嶠



嶽終奉梁山紫氣升於壽宮甘露遍於陵樹白兔馴  
擾瑞草呈祥恭惟昭陵載感王業肆台小子夙奉睿  
圖及齋戒虔誠率祇祀典聖容昭見靈迹尤彰每四  
方多虞中國有事雖升龍已遠而躍馬如神及配奠  
壽宮親聞忉躍幽明合慶今古未聞蓋皇天眷於我  
唐神心昌於後嗣延祚之祉豈獨在予一人錫類之  
恩宜廣覃於四海可大赦天下自開元十七年十一  
月二十二日昧爽已前大辟罪已下罪無輕重已發  
覺未發覺已結正未結正繫囚見徒常赦所不免者  
咸赦除之自先天以來有雜犯經移近處流人并配

隸磧西瓜州者朕捨其舊惡咸與惟新並宜放還其  
反逆緣坐長流及城奴量移近處編附爲百姓左降  
官量移近處官人有亡官失爵齒力未衰者量加收  
錄天下百姓無出今年地稅之半如已徵納聽折來  
年通租懸調在百姓腹內者一切放免孝子順孫義  
夫節婦旌表門閭終身勿事諸州侍老百歲以上賜  
帛十段九十已上賜五段八十以上賜三段獻陵昭  
陵定陵官吏并管陵縣官各別加一階陵戶並放從  
良終身灑掃陵寢仍每陵側近取百姓六鄉以供陵  
寢永勿徭役自古帝王賢臣將相陵墓宜令所在州



縣致祭內外文武官三品已上加爵一等四品已下各賜一階亞獻皇太子鴻賜物二千疋終獻慶王潭賜物一千疋邠王守禮寧王憲薛王業各賜物八百疋忠王浚隸王洽鄂王滉光王浚等各賜物七百疋中書門下賜物五百疋開府王毛仲賜物三百疋皇親五等已上諸親三等已上及文武百僚各賜物有差自古明王因心以待人曲已以施物故休戚共而憂樂同也中書門下丞相尚書開府三省大將軍父並賜三品官九卿三監十二衛監門羽林軍五省長官三府尹大都督長史父各贈四品官五品已上清

官父各賜五品官凡所贈官宜兼贈母邑號俾夫群臣受榮上延父母先帝遺澤下及幽冥興言及此良多感歎君臣一體榮辱是同龍蛇之歌古今作戒其唐元年兩營立功官三品以上與一子官其四品已下選日優與進改京兆府供頓縣免今年地稅諸道戰亡人家邠州縣存恤不支濟者量事賑濟諸軍健兒別勅行人各賜勲兩轉

十八年正月丁巳親迎氣於東郊祀青帝下制曰皇王之化備載於所陳必順時而行政將奉天而育物考古之要莫不繇斯自膺寶位欽若上玄萬物叶



心庶物簡易齊七政以察璿璣勸兆庶而勤稼穡日  
慎一日于今二十年矣何嘗不夙夜祇畏憂勞在懷  
思致黎元以弘政理屬獻歲初吉乘時布令是用敦  
本復古將必稽於月令始謀作則先有事於春郊宜  
因展禮之辰別布惟新之澤其天下見禁囚徒自開  
元十八年正月五日昧爽已前大辟罪已下罪無輕  
重已發覺未發覺已結正未結正繫囚見徒常赦所  
不免者咸赦除之其左降官及流移配隸安置罰鐘  
効力之類并宜量移近處其官已復資至叙用之時  
不須爲累其流人配隸并一房家口者所犯人情非

劫害身已亡歿其家口放還流人及左降官考滿載  
滿丁憂服滿者亦准例稍與量移其亡官失爵放還  
不齒及諸色被停解免與替人等非犯贓者宜令司  
存勘責量加收叙其衰老疾病者仍與致仕官天下  
百姓今年地稅并諸勾徵欠負等竄在百姓腹內未  
納者并一切矜免亞獻太子鴻賜物二千疋終獻寧  
王憲賜物一千疋文武百官及有司職掌等各賜束  
帛有差率土之內賜酺三日其海內五嶽四瀆及諸  
鍾名山大川及靈跡并自古帝王得道升仙忠臣義  
士先有祠廟者各令郡縣逐處設祭



十九年四月壬午詔曰法以閑邪刑以勸化因時而用蓋非獲已朕自臨御天下憂勞庶務以至誠感物道既有孚以致理和人仁或繇已豈欲以刑制政期於以化清刑故不用殊絕之誅每施寬宥之令而遷善者衆犯法者寡斷獄十數聞諸有司然猶一夫不獲在予實懷多愧寰宇殷廣京都浩穰繫于微纏或未聽理逮捕斯擾糧饋爲勞生業或虧何以卒歲言念於此深用憫然况今長歲在辰耘耨斯切順時立政存于恤人思弘在寬之典庶無留獄之弊其天下囚徒卽令疏決其妖詭盜賊造僞頭首旣深蠹時政

須量加懲罰刑名致死者各量決重杖一百長流嶺南自餘支黨被其誣誤矜其至愚量事科罰使示其懲劄流已下罪並節級處分令中書門下就大理及府縣詳理

八月辛巳帝降誕之日有黃雲三道於西方制天下死罪配流已下罪原免之

二十年二月壬午制曰行慶施惠所以奉天時緩刑恤獄所以愛人命今陽和布序草木自榮而或入于罪隸嬰于春榮同被亭育之恩未暢生成之施言念于此深用憫然思弘時令以哀黎庶應天下囚徒罪



至死者特寬宥配隸嶺南遠惡處其犯十惡及造僞頭首量決一百長流遠惡處流罪罰鎮三年其徒已下罪并宜釋放其有官吏犯賊推未了者仍推取實收定名訖然後准降例處分計賊一疋已上及與百姓怨讎者并不須令却上其上都委中書門下疏理京城委留守天下諸州長官當日處理其責保停務之類並宜准此

十月辛卯北巡狩至潞州飛龍宮曲赦潞州給復三年兵募丁防悉放辛丑至北都曲赦太原給復三年十一月庚午祀后土於雒上是日大赦天下制曰昔者巡狩所至柴瘞所在蓋取誠享以尊告類朕承祖宗之烈獲主神祇之祀夙夜祇畏不敢荒寧故勒兵朔垂先展義於汾社迴旆睢上遂有事于郊壇王者父事天母事地則漢氏祈穀未始正名周禮降神乃爲微福而已朕以天命之重子道爲先惟茲精誠在乎教孝庶蒙福於四海期永康於兆人是以率繇舊章敬恭明祀嚴配之誠旣展奠獻之禮又終且春秋之義大事在祀齋祭之禮庶品惟祺豈獨在予而有斯變可大赦天下自開元二十年十一月二十一日昧爽已前大辟罪已下罪無輕重已發覺未發覺已



結正未結正繫囚見徒常赦不免者咸赦除之官人犯贓及有罪被推者本罪雖原不得更令却上先天以來雜犯流移人并配隸人等各量移及先經量移官資未復本品者奏聽進止天下遭損免州及供頓州無出今年地稅如已徵納聽折來年逋租懸調貸糧種子欠負官物在百姓腹內者並宜放免諸州開元十七年已前所有貸粮種子欠負官物在百姓腹內者亦宜准此孝子順孫義夫節婦旌表門閭終身勿事諸州侍老百歲已上賜粟五碩八十已上賜粟三碩亞獻皇太子鴻賜物二千疋終獻慶王潭賜物

二千疋忠王浚已下各賜物三百疋裴光庭蕭嵩弼亮朕躬弘益思遠不有優異何殊等夷加階賜爵之外各與一子官仍賜物二百疋二王後及長公主嗣王郡主縣主各賜物二百疋行從文武官并節級賜物升壇三品已上特賜一階應入三品官階相當不限考數緣大禮有執掌官賜勳三轉內外文武官三品已上賜爵一等四品已下各加一階致仕官賜物有差行從蕃客共賜物五千疋管壇一鄉百姓給復二年武德初功臣每有大慶必存追遠業參運始而義合賞延其子孫沉翳無在朝者宜令勸責卽與官



唐元立功官等艱難之際誠效亦深言念其功豈忘終始其三品已上各賜一子官五品已上各賜紫金魚袋有亡歿者優贈與官仍與一子官兩京留守京兆河南尹四大都督府長史諸軍節度副大使准行從官例處分諸道陣亡人家邠州縣存恤不支濟者量事賑給皇親中有文武才堪任使者委宗正具以名薦當有獎擢五嶽四瀆名山大川及自古聖帝名王忠臣輔相各令致祭務盡誠潔率土之內賜酺三日

二十一年五月戊子以皇太子納妃下制曰禮有謹

於初義亦重其本凡是姻媾且猶正於人倫况在元良更將承于宗祀皇太子鴻儲副是屬仁孝自然爰從吉辰式備嘉禮上事下繼君子重之言告言歸朕豈無慰非獨在予之慶宜申與衆之澤囚徒死罪特宜免罪配流嶺南遠處流罪降至徒徒已下罪並宜釋放諸道征行人家及鰥寡孀獨委州縣長官簡較矜放差科使安其業長安萬年兩縣百姓及今月當畚人等並免其家今年地稼京文武九品已上各賜勲一轉東宮九品已上及諸司緣禮會祇供官等更加一轉五禮使兵部尚書兼中書令蕭嵩特封徐國



公禮會使黃門侍郎同中書門下平章事韓休特與  
三品妃禮會使少府監馮紹正賜紫金魚袋皇太子  
舅尚輦奉御趙迥遵特與三品及五品官前右威衛  
胄騎趙迥進特與五品及五品官皇太子侍讀侍書  
等各加一等階其太子諭德潘肅特與五品太子妃  
兄通事舍人薛愿特與五品及五品官今日應預會  
官等各節級賜物卽宜領取安慰者所以宣其情頒  
錫者所以將其意公卿百辟庶知朕心

二十二年五月詔曰時尚炎蒸人或寃繫豈忘仁恕  
固須省察其兩京都城見禁囚宜令中書門下及留  
守簡較覆訖徒已下罪及委所繇長官據情狀量決  
罰便放死罪已下遞降一等有情狀難容合決格杖  
者決訖准例處分天下諸司委刺史並准此

二十二年正月乙亥親耕籍田大赦天下制曰昔者  
受命爲君體元立極未有不謹於禮而能見教於人  
朕且庶乎有慙作者方冊存而可舉舊章絕而復尋  
自古所行無一而廢將以上乞靈於宗社下蒙福於  
黎元朕茲精誠天實降鑒今嗣歲初吉農事將起禮  
先陳於耕籍義緣奉於粢盛所以嚴祗敢不敬事故  
躬載耒耜親率公卿以先萬姓遂終千畝謂篤本之



爲爾何布澤之更深宜有順於發生俾無偏於行惠可大赦天下自開元二十三年正月十八日昧爽已前大辟罪以下罪無輕重已發覺未發覺已結正未結正繫囚見徒咸赦除之其犯十惡死罪不在此限自餘死罪并節級降等處分天下諸州貸糧種子并宜放免京兆河南府通縣欠負亦宜放免天下戶役及貢賦先令中書門下均融減省宜速與條奏諸軍行人有父母年老七十已上者放還本貫行人有身亡者爲造棺槨遞還本鄉兩京城內今年所有諸雜夫役并宜放免農桑是時不得妨奪州縣官倍加勸

課孝子順孫義夫節婦並旌表門閭鰥寡惸獨不能自存量加優恤天下侍老百歲已上版授上州刺史九十中州刺史八十以上州司馬七十已上所繇仍量給酒肉各令存問亞獻皇太子鴻賜物二千疋終獻慶王潭賜物一千疋邠王守禮等各賜物一千疋忠王浚已下各賜物三百疋汝陽郡王淳以下各賜物三百疋裴耀卿張九齡李林甫自期翊贊誠有忠益頒賞以序等數須優各與一子官賜物三百疋二王後賜物一百疋長公主各與一子官仍各賜物二百疋嗣王郡主縣主各賜物一百五十疋京文武官九



品已上官三郡留守諸道採訪使及節度使賜物有差管籍田縣令更賜物六十疋京文武官及朝集使諸道節度使採訪使新除五品已上官未赴任畿縣令見在陪位者三品已上賜爵一級四品已上加一階皇親并内外文武官九品已上各賜勳一轉蕃客應陪位者共賜物五千疋近壇百姓各免今年雜差科宗廟致享務在豐潔禮經沿革必本人情籩豆之薦或未能備物服制之紀或有所未通宜令禮官學士詳議具奏朕自臨天下二紀于茲不敢荒寧日加兢業而災眚未弭黎人未康若有繇而然則在予之

責有能直言極諫者具以狀聞每竭賢良無忘監寐頃雖虛佇未副旁求其或才有王霸之畧學究天人之際智勇堪將帥之選政能當牧宰之舉者五品已上清官及軍將都督刺史各舉一人孝悌力田鄉閭推挹者本州刺史長官各以名聞致仕官久歷清資始終著稱年漸衰邁情有可矜量與改職依前致仕宗室中有才行著聞比尚沉屈者委宗正卿責勘奏聞唐元兩營立功官量與進改亡官失爵量加收叙五嶽四瀆名山大川及自古聖帝明王忠臣良相並令所在長官以禮致祭都城之內賜醮三日



二十四年四月丁丑勅曰朕每思政本先教後刑而難遷之徒抵罪猶舉幽繫囹圄綿歷歲時今漸向儆蒸豈忘惻隱仍慮持法者不謹得罪者有寃若無省察何云哀矜天下見禁囚犯十惡死罪及造僞頭首劫殺人先決六十長流嶺南遠惡處自外死罪先決一頓並流嶺南流罪情狀重者決六十輕者決一頓決訖並放徒已下並放其有隱沒詐情官物及盜仍責保立限徵賦唯節文處分其官人犯贓合解免仍勿令重上都城內宜令中書門下京城委留守外州委本州長官卽踈決處分

十月發東都還京甲子至陝州勅曰朕永懷西土陵寢在焉至自東都誠慰罔極兼茲巡省且無怨思優予之望多謝哲王飲至之規豈忘前典其供頓州應緣夫役差科並免今年地稅行從飛騎萬騎三衛引駕監門各賜物五段兵曠掌閑及諸色當蕃人各賜物三段緣路供頓刺史縣令及專知官各賜一中上考從行有職掌武官賜勳一轉京兆及岐同華三州畿輔之間百役所出至於征鎮又倍餘州其今年租并依本州納其脚縱已支入京亦令所司計折酌還兩京城內及京兆府諸縣囚徒反逆緣坐及十惡故



殺人造僞頭首死罪特宜免罪長流嶺南遠惡處其餘雜犯死罪隸配効力五年流罪並放罪人犯贓量罪貶降緣近頃所損麥苗宜令州縣卽簡括量酬價直畿內侍老九十已上量賜酒麩鰥寡惸獨及征行之家宜令州縣長官親自存問如有疾患量加醫藥使近甸之內咸有賴焉

二十六年正月丁丑親迎氣于東郊祀青帝下制曰皇王之化載籍所陳將奉天而育物必順時而行政雖禮文則著而親祠蓋闕朕自膺寶曆且踰二紀承宗社之降祉賴公卿之川心萬物阜成庶務簡易思

以黎獻臻夫仁壽是用敦本復古將必稽於月令謀始作則先有事於春郊宜因展禮之辰式布惟新之澤其天下見禁囚應犯罪者特宜免死配流嶺南已下罪並放免朕每念黎甿斃於征戍親戚多別離之怨關山有往復之勤何嘗不惻隱於懷寤寐增嘆所以別遣召募以實邊軍錫其厚賞便令常往今諸軍所召人數向足在於中夏自可罷兵旣無金革之事足保農桑之業自今已後諸軍兵健並宜停遣其見鎮兵並一切放還京畿之內雜役殷繁言念劬勞豈忘優恤頃以櫟陽等縣地多鹹鹵人力不及便至荒



廢近者開決皆生稻苗亦既成功豈專其利京兆府界內應雜開稻田并散給貧丁及逃還百姓以爲永業書不云乎不作無益害有益語不云乎奢則不遜儉則固緬懷前古嘗折在心將斲雕以爲樸期上行而下效自今已後王公不得以珍物進獻所司應緣宮室脩造務從節儉但蔽風雨勿爲華飾至於金玉噐物諸色雕鏤朕緣蕃客所要將充宴賞今流俗之間遞相倣效既損才於無用仍作巧於相矜敗俗傷農莫斯爲甚并一切禁斷以絕浮華古者鄉有序黨有塾將以弘長儒教誘進學徒化人成俗率繇於是

斯道久廢朕用憫焉宜令天下州縣每一鄉之內別各置學仍擇師資令其教授其諸州鄉貢明經進士每年引見訖更令國子監謁先師所司設食學官等爲之開講質問疑義且公侯之裔皆稟義方學禮聞詩不應失墜容其僥倖是瀆化源其於貴胄子孫多有不專經業便與及第深謂不然自今已後宜依令式考試朕之爵位惟待賢能雖選士命官則有常調而安卑退跡尚慮遺才其內外八品以下官及草澤間有學業精博蔚爲儒首文詞雅麗通於政術爲衆所推者各委本州本司長官精加搜擇具以聞薦發



生之月實在于行仁利物之心莫先於作善先斷捕  
獵令式有文所繇州縣宜嚴加禁止其每年千秋節  
日仍不得輒有屠宰釋道二門皆為聖教義歸弘濟  
理在尊崇其天下寺觀有道士女冠僧尼者宜量寺  
觀大小各度六七人簡灼然有經業戒行為鄉閭所  
推仍先取年高者凡百鄉士朕之同德宜勉所職以  
全時令亞獻忠王嶼宜賜物一千疋終獻穎王璩賜  
物五百疋邠王守禮寧王憲各五百疋慶王琮已下  
及長公主郡縣王二王後京文武官賜帛各有差天  
下諸州侍老宜令所繇長官量賜酒肉務存優養今

朝廷無事天下和平美景良辰百官等任追勝為樂  
宜卽布告中外咸使聞知

四月己亥朔始令太常卿韋謏讀時令于宣政殿百  
寮於殿上列坐而聽之勅曰朕仰稽古訓思致人和  
爰發繇衷之旨以行順時之政今孟夏初吉三農在  
朝禮先決於薄刑義必寬於輕繫既聽其令用軫於  
懷囹圄之間少間於曷法澄清之使咸盡於忠公猶  
慮吏有煩苛人或寃滯是爽和平之氣殊乖敬授之  
心其天下見繫囚徒及事發應推身不禁者放卽遣  
使分往諸道量事疏決及宣布時令除犯贓賄名教



十惡死罪自餘徒已下特宜放免迴日奏聞務在欽恤以稱朕懷

七月己巳冊皇太子是日大赦天下制曰自昔聖人恭有神噐必立儲兩崇其繼明所以尊宗廟重社稷也朕獲纘休運丕承寶曆五聖之業敢不克勤萬邦之本期諸永固是以式遵彛訓乃擇元良太子與植性溫恭因心孝友文武之道既著君親之義以弘有命之初咸聞慶躍興言士庶能協朕心是用擇以吉辰申之冊命思惠率土以暢休期可大赦天下自開元二十六年七月二日昧爽已前大辟罪無輕重已

發覺未發覺已結正未結正繫囚見徒嘗赦所不免者咸赦除之比年已來十道採訪使通官人惡狀以其微瑕爲終身之累豈得永無甄叙許以自新宜令御史臺及刑部大理寺參詳所犯輕重類例開奏內外交文武職事官九品已上各賜勳一轉五品以上子爲父後者亦賜勳一轉其忠王府官及侍讀侍書除賜之外三品以上賜爵一級四品以下各加一階仍並卽與改轉緣冊命行禮官各賜物有差今月番見上飛騎萬騎監直長三衛引駕細伏執扇黃衣長上等各賜勳一轉曠騎番兵各放免一番天下侍老八



十已上各賜粟三石帛三段百歲已下賜粟五石綿帛五段并加版授至如磧西之人路途遙遠往復勞弊頗異諸軍其中領長往者已別有處分訖年鐘向潘應合放還未到之間稍省優假其家內諸色雜科并空放免如有營農不自辨者州縣量事助借各使存濟京畿近輔百姓所出雖庶務簡省終異於諸州其百姓等應單貧下戶者特放今年半租率土之內賜酺三日

冊府元龜

冊府元龜

淮南李嗣京參閱

西極文翔鳳訂正

豫章黃圖琦較釋

帝王部 八十六

赦宥第五

唐玄宗開元二十七年二月己巳加尊號開元聖文神武皇帝大赦天下制曰夫執大象建皇極者必藉彝訓而受鴻名所以應乎天而順乎人也朕嗣守丕業二十七年受命之初既膺明號尚多祗懼已謂崇

冊府元龜

帝王部

卷之八十六



高而公卿宗子緇黃耆艾披誠瀝懇請闕上言僉以  
爲乃聖乃文祖宗大烈恭惟纘服必在欽承願以休  
名施於薄德抑而不許凡已十年爰迨於今又陳入  
請上追奉先之義下稽從衆之言將從至公不可固  
拒以今日敬請大號曰開元聖文神武皇帝勉從典  
訓良增感懼惟新之號既不私於朕躬非常之澤宜  
普覃於率土大赦天下自開元二十七年二月七日  
昧爽以前大辟罪已下罪無輕重已發覺未發覺已  
結正未結正繫囚見徒常赦所不免者咸赦除之自  
開元已來諸色應負痕累人等咸從洗滌令許自新  
所司更不瀆以此爲累其有別勅停官及亡官失爵  
者放歸不齒之類量加收敘左降官及諸色流人並  
稍量移近處朕每於黎甿常恐失所求其賑困乏必  
在及時比來諸州或有傷損處所請賑給例逼春農  
比及奏報又淹時月旣無救於懸絕亦何成於惠養  
自今已後每年至秋收後卽宜遣使分道宣慰仍與  
採訪使及州縣相知巡簡百姓間或有乏絕不自支  
濟者應瀕蠲放及賑給便量事處置訖奏聞天下百  
姓宜放今年地稅古者三載考績黜陟幽明允叶大  
猷以勸天下諸道所通善狀但優仕進之輩與爲選



調之資責實存名或乖古義自今日已後諸道更不  
湏通善狀每至三年朕當自擇使臣觀察風俗有清  
白政理著聞者當別擇用宗廟致敬必先於如在神  
人所依無取於非族深惟至理用切因心其應緣太  
廟五享於宗子及嗣郡王中揀擇有德望者令攝三  
公行事其異姓官吏不湏令攝其草澤間有殊才異  
行文堪經國為衆所知不求聞達者所繇州長官以  
禮徵送皇太子璵男及慶王琮已下男宜並封授官  
鄴王守禮寧王憲各與一子三品官其内外文武官  
三品已上賜爵一級四品已下各加一階長公主公

主及嗣王郡王各與一子官郡主縣主各放一子出  
身二王後及諸方蕃客宜各賜物諸致仕官量與進  
改依前致仕天下侍老百歲已上版授下州刺史婦  
人版授郡君賜粟五石綿帛五段九十已上版授上  
州司馬婦人版授縣君賜粟三石綿帛三段八十已  
上版授縣令婦人版授鄉君賜粟兩石綿帛兩段京  
城父老等宜共賜物三千段僧尼等賜物一萬匹天  
下寺觀每六齋日宜轉讀經典懲惡勸善以闡大教  
率土之內賜酺五日  
二十九年五月庚戌帝夢玄元皇帝告以休期畫真



容希告天下制曰道有三寶慈居一焉欽若至言爰  
茲宥過天下見禁囚徒其十惡罪及造偽頭首并謀  
殺妖訛宿宵人等特宜免死配流嶺南官人犯贓據  
情狀輕重量事貶降餘一切放免且夫愛人之義長  
之育之務在清淨合於簡易至於州縣造籍之年因  
團定戶皆據資產以爲升降其有小葺園廬粗致蓄  
積多相糺訐便被加等朕情惟啟本義在勸農欲使  
野絕遊人國無曠土安可得也自今歲已後且三五  
年間未湏定戶其中或有家資破散簡覆非虛則不  
可循舊差科量事與降今者真容應見古所未聞福

雖始於邦家慶宜均於士庶其親王公主郡縣主內  
外文武官等並是賜錢至休假之辰宜以素食用申  
慶樂諸道節度使及將士等亦准此其兩京諸州父  
老亦量賜錢同此歡晏其錢以當處官物充伊爾公  
卿逮于黎獻宜勉崇玄化共復淳源宣布遐邇明知  
朕意

天寶元年正月丁未朔御勤政樓授朝賀大赦天下  
制曰古先哲王之致理也皆上順天心下稽人事時  
令贊發生之德靈符協紀年之稱考彼前載斯爲大  
猷恭惟烈祖玄元皇帝天寶賜慶象帝之先垂裕後



人重光五聖自朕嗣守丕業洎三十年實賴宗祐降  
靈昊穹乎祐萬方無事六府惟脩寰宇晏如庶臻於  
理然則乾元在上仁覆爲德皇王臨下惠化攸先思  
弘善貸用廣慈育遵道寶而建元暢玄風而不宰况  
屬陽和布氣獻歲發生宜覃在宥之恩式降惟新之  
澤可大赦天下改開元三十年爲天寶元年正月一  
日昧爽已前大辟罪已下罪無輕重已發覺未發覺  
已結正未結正繫囚見徒嘗赦所不原者咸赦除之  
諸色左降官並流人未經量移者亦與量移陽春布  
和鳥獸孳育宜禁麇卵以遂生成自今已後每年春

天下宜禁弋獵如聞百姓之內或有人戶高丁多苟  
爲規避父母在乃別籍異居宜令州縣勘會其一家  
之中有十丁已上者放兩丁征行賦役五丁已上放  
一丁卽令同籍共居以敦風化天下侍老八十已上  
者宜委州縣官每加存問仍量賜粟帛侍丁者令其  
養老孝假者矜其在喪比者王政優容俾申情理而  
官吏不依令式多雜役使自今已後不得更然國之  
急務莫若求才頃者數遣搜揚士庶尚慮遺逸更宜  
精訪以副虛懷其前資及白身人中有儒學博通及  
文詞秀逸或有軍謀越衆或有武藝絕倫者委所在



長官具以名薦若乃弘我風化實惟方岳必佇其人  
以膺共理其京文武官五品已上清資並郎官據資  
歷人才堪爲刺史者各人封狀自舉但文宣垂訓事  
必正名而黃鉞古來以金爲飭金者應五行之數有  
肅殺之威去金稱黃理或未當其黃鉞宜改爲金鉞  
副武威之義焉内外文武官九品已上各賜勲兩轉  
前王重典在乎祭祀况屬惟新事宜昭告五嶽四瀆  
名山大川諸靈遶及自古帝王忠臣義士並令所繇  
州縣致祭

三月丙申合祭天地於南郊制天下囚徒罪無輕重  
並放免流人移近處左降官依資敘用身死貶處者

量加追贈文武官三品已上加一爵四品已下加一

階

三載正月丙申朔御含元殿受朝賀下制曰履端正  
名義取垂範體元設教在乎變通雖沿革從宜罔不  
稽古朕纘復興運恭守睿圖嘗恐至化猶微淳風尚  
薄未能臻華胥之俗登可封之人故未明求衣日昃  
忘食厲精爲理思致離和歷觀載籍詳求前制而唐  
虞之際煥乎可述用是欽若舊典以協惟新可改天  
寶三年爲載今春事將興陽和布澤發號施令之日



革故履新之時宜弘在宥之恩以助生成之化其天下見禁囚徒應雜犯罪死者宜各降一等自餘一切放免其十惡及造偽妖妄頭首官吏犯賊並姦盜等害政既深情難容恕不在免限凡諸郡縣仍令太守縣令勸課農桑其先處分太守縣令在任有增減戶口成分者所繇司量爲殿最自今已後太守縣令兼能勾當租庸每載加數成分者特賜以中上考如三載之內皆成分所司錄奏超資與處分其丁戶仍須案實不得取虛挂之名使新鄰代納受其艱弊凡在黎獻實資存恤一失生業則流庸不歸每軫於懷深

可矜憫諸色當蓄人應送資課者當郡具中尚書省勾覆如身至上處勿更抑令納資致使往來辛苦從閏二月至六月已來其當上入中有單貧老弱者委郡縣長官與所繇計會便放管農諸軍征鎮及有疴羸疾病者委節度使速釋放還中外庶僚勉修其職各副朕意宣布遐邇咸使知聞

三月壬申制曰王者法天惠人順時行令是惟舊典用致和平朕臨御萬邦於茲三紀宵衣旰食思弘至化尚恐天下郡縣囹圄滯留不卽疏決以傷和氣今三農在時宜助生育庶覃寬宥之澤以協上玄之心



其天下見禁囚徒應合死配流嶺南流已下罪并見  
徒一切放免其責保在外及追捉未獲者并同見禁  
例處分其京城內宜令中書門下卽分往疏決應合  
流人便配訖聞奏其東京及北京兼諸郡各委所繇  
長官准此處分卽宣示中外咸使知聞

十二月癸丑親祠九宮貴神於東郊禮畢大赦天下  
制曰九宮嚴祀百代莫修豈日給之不暇將明靈之  
有待朕當晨君臨握圖績業每聽政中曷疇咨讜言  
觀書乙夜以求撫實勵精爲理三紀於茲上荷宗廟  
延祥克開厥後下賴股肱協德以致雖熙而鱗鳳龜

龍近遊郊藪蠻夷戎狄遠輸琛貢乘時來之休運恢  
皇王之遠圖是以圓丘方澤之儀升中告類之禮無  
典不舉靡神不懷恭惟九宮明祠尚闕載深兢惕用  
建靈壇爰以元辰親執奠獻協青春發生之慶祈黔  
庶啓佑之福今至誠式展大禮云備瑞景和風神心  
如谷無疆之祉豈獨在予非嘗之澤宜覃率土可大  
赦天下自天寶三載十二月二十五日昧爽已前大  
辟罪已下罪無輕重已發覺未發覺已結正未結正  
繫囚見徒並赦除之其十惡死罪造僞頭首謀殺攻  
劫及宮典犯賊不在此限朕深惟善政實在養人作



法務從於寬簡任事必量於齒力比者成童之歲卽  
挂輕徭旣冠之年便當正役憫其勞苦用軫於懷自  
今已後天下百姓宜以八十已上爲中男二十三已  
上成丁每載庸調八月徵收農功未畢恐難濟辦自  
今已後延至九月三十日爲限諸軍行人遠爲邊扞  
修短之分雖有定期從役而終良深軫念其陣亡及  
在軍亡歿骸骨尚未還貫者宜令節度使給其棺櫬  
遞歸本鄉其家內無人付親收葬仍令所繇郡縣量  
事優恤使得濟辦自古聖王皆以孝理五常之命百  
行莫先移於國而爲忠事於長而爲順永言要道孝

行過人鄉閭欽伏者宜令所繇州郡長官具以名薦  
其有父母見在別籍異居虧損名教莫斯爲甚親歿  
之後亦不得分拆自今已後如有不孝不恭傷財敗  
產者宜配隸磧西用清風教朕惟熙庶績博訪逸人  
豈惟振拔罪淹以期於大用亦欲褒崇高尚將敦於  
薄俗虛佇之懷蓋若於此其有高蹈不仕遁跡丘園  
爲遠近所知未經薦舉者委所在長官以禮徵送又  
崇德追遠式閭封墓用旌前烈以協大猷自古聖帝  
明王名臣烈士陵墓有頽壞者宜令管內量事修葺  
仍明立標記禁其樵採天下侍老百姓已上賜綿帛



五段粟三石八十已上三段粟兩石仍令郡縣長官存問給付亞獻太子璵宜賜物二千疋終獻慶王琮一千疋正衣夾侍各五百疋親王三百疋新封建郡王及國公一百疋賢妃三百疋長公主各三百疋公主各二百疋嗣郡王各一百疋中書門下三品竭心翊戴弘益實多各與一子官如先已授官量與一人改轉内外文武三品已上賜爵一級四品已下各與一階一品賜物七十疋三品已上六十疋五品已上賜物四十疋六品已上二十段諸道節度使各賜物一百疋三京留守及二王後各八十疋採訪使各六

十疋諸蕃客共賜二千疋其唐元功臣締構之初竭其忠款欽功念舊情所不忘普恩之外更加一階其身歿者各贈一官皇親五等已上及九廟子孫諸親三等已上未出身者與一子出身其前資者選日稍優與處分見任者更賜勳兩轉應天下賜誦三日六載正月戊子有事於南郊禮畢下制曰昭事昊穹必惟殷祀盖順帝則而成政也肅雍清廟必惟嚴享盖繼先志而爲孝也則累聖之德在人元陽之和在候思所以達明靈之景貺廸皇王之大猷者矣朕夕惕宵衣奉天纘業勉思政道惟懷永圖賴百辟庶官



輔子不逮聲朔無遠車書靡殊加以乾符坤琮日來  
月往感福應之尤盛懼明祠之未殷且資父事天因  
親設教泐情以達禮廣敬以推尊時享之誠寧宜異  
數日舉之饋豈忘事生是以疇咨故典率循新禮對  
越上靈聿追嚴配既而崇牙宿設明德惟馨敬爾臣  
工駿奔執豆陟降至止樂編禮成精意上協神休下  
谷宜廣維祺之福以覃作解之恩其天下見禁囚徒  
除十惡死罪及官典犯贓目餘一切放免自天寶元  
年已前流人及配隸效力左降官非反逆緣坐其並  
量移近處其中有年齒衰暮情可哀矜者仍聽致仕

朕承大道之訓務好生之德施令約法以去極刑議  
罪執文猶存舊目既措而不用亦惡聞其名自今已  
後斷絞斬刑者宜除削此條仍令法官約近例詳定  
處分三皇五帝道冠開闢創物垂範功濟生靈繼天  
之德在墳典而昭著勤人之祀於禮文而尚闕永言  
龜鏡宜示欽崇其三皇宜置一廟五帝亦置一廟卽  
令所司卜擇吉地營建仍以時致祭其廟令太嘗寺  
簡較諸廟之主禮有遵於合祭同等則附義亦取於  
旁通惠宣等太子雖官爲立廟比來子孫自祭或時  
物有闕禮儀不備興言及此良用撫然宜與隱太子



及懿德太子列次諸室擇棟一寬處同爲廟一應祭  
祀及樂饌等並令官供每差祭官宜依嘗式仍都置  
廟官及丞等自餘所廢廟官等並宜減省莫獻既昭  
感恩增遠恭惟陰教以集禎祥自獻祖宣莊皇后張  
氏已下祖父未有贈官及一房子孫沉翳所司卽以  
名聞將展褒崇以申追慕王業之功羣才佐命中興  
之後元宰協心且配食廟庭必重勲德循名册府尚  
有闕遺緬懷茂功用增禮典自今已後大廟配享功  
臣高祖室宜加裴寂劉文靜太宗室加長孫無忌李  
靖杜如晦高宗室加褚遂良高季輔劉文軌中宗室  
加狄仁傑魏元忠王同皎文武之道旣惟並用宗敬  
之義不可獨闕其鄉貢武舉人上省先令謁太公廟  
每拜大將及行師尅捷亦宜告猷今勝殘在運無事  
爲心顧此朝儀當符至理旣時非盱食將至升平而  
廷設殺刑何成在宥其每日立仗食設杖鐃等並宜  
停廢立身揚名所以廣孝流根自葉亦在推恩旣切  
因親之心須開議事之制其内外文武官五品已上  
官父祖無資蔭者其所蔭宜同子孫用蔭之例五服  
之紀宜所跂及三年之數以報免懷齊斬之殊雖存  
出母之制顧復之慕何申孝子之心其出嫁母宜終



服三載祭祀之典犧牲所備將有達於虔誠蓋不資於廣殺况牛之爲畜人實有賴旣功施播種亦力被於車輿此比餘生尤可矜憫但前聖有作難爲盡廢明神克享亦在深仁自今已後每大祭祀應用騂犢宜令所司量減其數仍永爲嘗式崇我祖訓其惟道門將以福助生靈弘拯天下諸觀道士等如聞人數全少修行多闕其欠少人處宜度滿七人並取三十已上灼然有道行經業者克仍令所繇長官精加誥練採訪使重覆勿使踰濫度訖挾名奏聞其諸觀有絕無人處亦量度三二人准此簡試選賢擇能嘗慮

不廣三府之辟則唯採於大名四科之薦蓋不通於小學今承平旣久仕進多端必欲遠賁弓旌載空巖穴片善必錄末技無遺天下諸色人中通明一藝已上各任薦舉仍委所在郡縣長官精加誥練灼然超絕流輩遠近所推者具名送省仍委尚書及左右丞諸司委御史中丞更加對試務取名實相副一時奏聞四瀆五嶽雖差秩序與雲播潤盖同利物崇號所及錫命宜均其五嶽旣已封王四瀆當升公位遞從加等以荅靈心其河瀆宜封靈源公濟瀆封清源公江瀆封廣源公淮瀆封長源公仍令所司擇日差使



告祭自古聖帝明王忠臣烈士陵墓有頽毀者先令修葺并禁樵採歲月深久摧壞或多宜令所繇郡縣申明前勅處分並五嶽及諸名山大川並令所在長官致祭諸郡義倉本防水旱如聞多有費損妄作破除自今已後每郡差一上佐專知除賑給百姓之外更不得輒將雜用天下百姓今載應損郡逋租懸調諸色勾徵變換等物及諸延限者並宜一切放免征行之家每令存恤差科之際或未優矜自今已後並准飛騎例蠲免天下侍老百歲已上賜綿帛五段粟三碩八十已上綿帛三段粟二石仍令所在長官存

問各卽分付亞獻太子璵賜物二千疋終獻慶王琮賜物一千疋京文武官各賜帛有差天下賜醕三日七載五月壬午冊尊號畢御勤政樓大赦天下制曰惟天法道惟后奉天旣合德以降符必執象以明本則上玄眷命有以丕承大寶鴻名斯爲公義朕纘宗社之重揚文武之烈克勤匪懈服道齊心允迪玄猷聿求至理日慎一日三紀於茲矣區夏大寧靈祇集貺而公卿宗子耆艾法流僉曰玉芝白魚神言瑞景天之應也敦信典禮務本崇儒人之應也化洽而風俗還淳氣和而疵癘不作天啓道運其何讓焉上荅



元符願增徽號披誠詣闕累上封章至請愈勤懇詞難奪以今日敬膺典冊曰開元天寶聖文神武應道皇帝式副人神感懼交集宜廣恩於善貸俾協慶於惟新可大赦天下自天寶七載五月三十日昧爽已前大辟罪已下罪無輕重已發覺未發覺已結正未結正繫囚見徒當赦除之其左降官及流移配隸安置罰鍾效方之數並稍與量移亡官失爵放歸不齒及諸色被停與替非衰老疾病者宜令所司量加收叙人和年登休運斯屬輕徭省賦惠政攸先將洽小康必弘厚貸其天下百姓來載租庸並宜放免及諸

色勾徵等亦一切放免自古帝王建邦受命必敬先代以循舊章周備禮文既存三恪之位漢從損益唯立二王之後自茲已降且復因循將廣繼絕之恩式弘復古之道宜於後魏子孫中簡擇譜屬灼然相承者一人委所司勘責准鄴公例定爲三恪陵廟所奏典職惟崇事雖更於有司任豈循於嘗秩其宗正卿宜與大嘗卿同品其少卿及丞亦宜准此又上古之君存諸號氏雖事先書契而道著皇王緬懷厥初寧忘咸秩其三皇已前帝王宜於京城共置一廟仍與三皇五帝廟相近以時致祭自古受命之主創業之



君皆經濟艱難戡定禍亂雖道謝於徃古乃功施於生人用率典章亦從禋祀其歷代帝王肇迹之處未有祠宇者宜令所繇郡縣量置一廟以時享祭仍取當時將相德業可稱者三人配祭仍並圖畫立像如先有祠宇霑享祭者亦宜准此式間表墓追賢紀善事有勸於當時義無隔於異代其忠臣義士孝婦烈女史籍所載德行彌高者所在亦置一祠宇量事致祭古者鄉有塾黨有庠所以明尊卑之義正長幼之序風化之道義在於茲先置鄉學務令敦勸如聞郡縣之間不時訓誘閭巷之內多虧禮節致使言詞鄙

褻少長相凌有黷清猷何成雅俗自今已後宜令郡縣長官申明條式切加訓道如有禮義興行及紀綱不立者委採訪便明爲褒貶具狀聞奏道教之設淳化之源必在弘闡以敦風俗頃列四經之科將冠九流之道雖及門求進頗有其人而覩奧竊微罕聞達者豈專精難就爲勸獎未弘天下諸色人等有通道德經及南華等四經任於所在自舉各委長官考試申送其崇玄館生自今已後每至選日宜減於嘗例次爲留放朕每以道元有屬思竭精誠經教所在豈忘崇奉且宗其道者師其人行其道者尊其禮晉琅



瑯王公府舍人楊真人護軍長史許真人丹陽上計掾許真人皆道著妙門感通玄闕降高真之迹爲上清之宗後漢張天師教達元和德宗太一正一之道幽贊生靈梁中散大夫貞白陶先生高尚塵表博達玄微綜輯真經傳授後學並令有司審定子孫將有封植以隆真嗣天師冊爲太師真白冊贈大保其洞宮山各置壇祠宇每處度道士五人並取近山三十戶蠲免租稅差科永供灑掃諸郡有自古得道昇仙之處雖先令醮祭循慮未周宜每處度道士二人其靈迹殊尤功應遠大者度三人永修香火其茅山紫

陽觀取側近二百戶太平崇元二觀各一百戶並蠲免租稅差科長克修葺灑掃應天下靈山仙迹並宜禁斷樵採弋獵如聞山林學道之士每被搜括且法之防邪本有所以至於宿宵妖訛亡命聚衆誘陷愚人故令禁斷郡縣遂一槩追逐使志道之者不得安居自今已後審係清潔更不得恐動以廢修行其五嶽四瀆名山大川各令本郡長官致祭朕刻意真經虔誠至道冀憑玄祐永錫黔黎每朝禮三清則宵衣忘寢或齋戒一室則蔬食精專不以勤躬爲倦務以徇物爲心况於宰殺尤加惻隱自今已後每月十齋



日不得輒有宰殺又閭閻之間例有私社皆殺生命以資宴集仁者之心有所不忍永宜禁斷且因親設教式本於人倫自葉流根必逮於榮養內外文武職掌官有五品已上其父老見在無官者宜授各一官仍令致仕其祖母見在准母例處分京官五品已下正員如父母已沒未有官者宜追贈所司勘會卽與處分睦親之義因心不忘前開府儀同三司竇瓊頃以容納微人頗虧憲典永懷舅氏追感渭陽宜申國恩再復榮秩可開府儀同三司仍放優閑不須朝會王澤無私豈殊於中外天瑞有慶頻屬於京輦寬大

之典則以博覃施惠之恩特申曲被其京師父老宜各賜物十段七十已上仍版授本縣令其妻版授縣君六十已上版授本縣丞天下侍老百歲已下版授下郡太守婦女版授郡君九十已上版授上郡司馬婦人版授縣君八十已上版授縣令婦人版授鄉君仍並卽量賜酒麪內外見任文武官九品已上宜各賜勲兩轉其京文武官見在京及致仕並陪位官諸方通表使及月番官等一品賜物一百疋二品三品八十疋四品五品五十疋六品七品三十疋八品九品二十疋兩京留守各八十疋其節度採訪使並諸



克宮使未回者並同在京例賜物貴妃楊氏稟性柔和因心忠孝克慎閨壺蹈禮循詩加以勤志玄宗協誠舉奉率勵宮掖以迪關雎宜賜物三千疋嬪御等賜物有差其大真觀雖已度人住持尚少宜更度道士七人太子璵宜更賜物二千疋慶王琮已下各賜物有差率上之內賜醕三日

八載閏六月丁卯羣臣上尊號帝御含元殿受册禮畢大赦天下制曰自昔皇王受命必降於元符天人協心乃彰於大號朕纘承玄緒虔奉睿圖何嘗不精意真宗專心庶政幸以方隅底定風雨時若人和歲

稔且洽於時雍極瑞殊祥荐臻於昭應故得玉芝再產秘牒玄通至道降休先聖儲祉顧惟菲德曷以克當是用祇薦崇名永揚洪烈郡公百辟援義比事誠請不已固辭不獲以今日敬膺典禮曰開元天地大寶聖文神武應道皇帝徽章載茂寅畏增深宜因稽古之典式布惟新之澤可大赦天下自天寶八載閏六月五日昧爽已前大辟罪已下罪無輕重已發覺未發覺已結正未結正繫囚見徒嘗赦所不免者咸赦除之朕永惟風教漸冀還淳至於弘貸之名亦思復古其天下百姓丈夫戶頭者宜各賜爵一級征鎮



之役其來久矣雖存素備諒在變通頃者用兵蓋非  
獲已今西戎摧殄北虜歸降南蠻東夷咸來稽顙亦  
可謂四海無事萬里廓清減戍息人思弘善貸其軍  
鎮兵非切要可均減者宜令本鎮節度使與所司商  
量處置奏聞其百姓有頻鎮經戍者已後差點之次  
不在此限高年給復義存養老因時定式務廣仁恩  
其天下百姓丈夫七十五以上婦人七十以上宜各  
給一人克待仍自揀擇至八十已上依嘗式處分唐  
虞省刑畫冠不犯秦漢制法密網維煩理亂之源得  
失斯在朕常想淳古務崇敦朴刑期不濫政協無爲

豈惟守於升平庶有臻於大道頃者詳諸條目已從  
推究至於結斷尚慮深刻所貴從寬示其知禁宜令  
中書門下與刑部大理寺法官審更詳定法律之間  
有所不便者具條目聞奏禘祫之禮以存序位質文  
之變蓋取隨時國家系本仙宗業承聖祖重熙累盛  
既錫無疆之休合享祭神思弘不易之典自今已後  
每遇禘祫並於太清宮聖祖前設位序正上以明陟  
配之禮欽若玄宗下以盡虔恭之誠無違至道比來  
每緣禘祫時廢時享事難適於從宜理或虧於必備  
已後每緣禘祫其嘗享無廢又奉先追遠禮惟昭後



崇福展敬義在因心自今已後獻祖宣皇帝宣莊光  
皇帝光懿皇后忌日宜令京城一日設齋太祖景皇  
帝景烈皇后代祖元皇帝元貞皇后忌日京城三日  
行道玄宗妙本實脩微言垂範傳策將弘至化朕所  
以發求道之使遠令搜訪因聽政之餘親加尋繹既  
判訛謬爰至簡編必闡揚以敦風教今內出一切道  
經宜令崇玄館卽繕寫分送諸道採訪使令管內諸  
郡轉寫其官本便留採訪郡一大觀持誦聖人垂訓  
蓋先於道學者宗本必有其師文宣王與聖祖同時  
俱爲教首雖考言比德聖在難名而問理叙經跡彰

親授思廣在三之義用崇得一之尊宜於太微宮聖  
祖前更立文宣王遺像與四真人列侍左右且道降  
真符天有成命藏之於密則取因名山彰之以類則  
發祥星洞况靈仙所集宜表殊真太白山可封爲神  
應公所繇四時祭祀其金星洞改爲嘉祥洞所管華  
陽縣仍置一祠宇仙人臺下置一觀兩京并十道於  
一大郡亦宜置一觀並以真符玉芝爲名每觀度道  
士七人修持香火戶部侍郎兼御史中丞王鉉以才  
授委以忠奉上項命精求玄記克協神心宜旌迺誠  
俾正章綬特與三品其李渾等三人旣親傳真誥因



冊府元龜 赦宥五  
獲元符當有甄明用旌福應宜令中書門下量其所  
能具狀聞奏當別處分又九州之鎮寔著禮經三代  
之典必崇望秩事既屬於報功義有符於錫命其九  
州鎮山除入諸嶽外並宜封公仍各置祠宇先已有  
祠宇者量更增修儲慶發祥當申昭報宜令所在長  
官各陳祭禮名山大川亦量事致祭天下侍老並量  
賜爵一級四品已上加一階其京文武官在京及諸  
色陪位官通表使等賜帛有差率土之內賜酺三日  
十載正月甲子有事於南郊大赦天下制曰皇天眷  
命必順於五行哲后馭時寔遵於三統考古之道何

莫繇斯朕欽若上玄嗣守丕業察璿衡以齊政念稼  
穡以勸人日慎一日四十載於茲矣何嘗不夙夜祗  
畏憂勞在懷思致黎元臻夫至理幸以刑清俗阜天  
成地平萬方底寧郡物咸遂雖慙大化且謂小康此  
皆至道儲祉宗社敷祐豈予菲薄而克致焉然則上  
稽歷象傍採輿議爰以土位承漢火行是憑大易之  
辭用紹前王之烈禎祥累應正閏攸分不改舊章惟  
新景運屬獻歲初吉乘時布和是用展祀崇禮竭誠  
昭報庶協發生之序載覃雷雨之澤可大赦天下自  
天寶十載正月十一日昧爽已前大辟罪已下罪無



輕重已發覺未發覺已結正未結正繫囚見徒嘗赦  
所不免者咸赦除之其左降官及流移配隸安置罰  
鍾効力之類並稍量移近處其官已覆資至叙用之  
日不須爲累其流人配隸并一家往者所犯人情非  
切害身已亡歿其家口放還流人及左降官考滿載  
滿丁憂服滿者亦准例稍與量移其亡官失爵放還  
不齒其諸色放停解考免與替人等非犯賊者宜令  
所司勘責量加救叙其衰老疾病者仍與致仕官天  
下百姓今載地租并諸色勾徵欠負等色在百姓腹  
內未納者並一切放免且京兆府及三輔三鄣百役

殷繁自今已後應差防丁屯丁宜令所繇支出別郡  
禮者所以訓導人俗昭事明祇所宜增修以會其本  
况國之大典在於精禋必資備禮以彰遵奉自今已  
後設祭南郊薦獻太清薦享太廟其太尉行事前一  
日於致齋所具羽儀鹵簿公服引入朕親授祝版乃  
赴清齋用展誠敬天子孝奉親極敬惟愛歿有思戚  
霜露之感愈深祭以嚴恭蒸嘗之敬如在且廟者貌  
也取像存焉是禮繇於情因心則感太廟宜置內官  
以備嚴奉仍於廟外別造一院安置庶申罔極之思  
無忘事生之禮嶽瀆山川蘊靈毓粹雲雨之澤利及



生人春秋之義存乎祀典况正其運序式遵成秩其  
五嶽四瀆及諸鎮山宜令專使分往置祭其名山大  
川及諸靈迹并自古帝王及得道昇仙忠臣義士孝  
婦烈女有祠廟者各令郡縣長官逐便致祭其有陵  
墓屋宇頽毀者量事修葺合應禁樵採宜申明四海  
攸廣百川朝宗德乃靈長道惟善利永言澤潤義在  
封崇其四海宜並封王仍差使備禮冊祭每順時行  
令奉道施法天心不違靈鑑不遠且去載長至庚子  
御辰今茲建元辛卯應歷立春乃標於歲首上巳更  
協於清明此氣序和調乾坤交泰既正東方之位咸

歸啓運之祥則政貴弘通上符天意况法以輔德刑  
以閉邪豈在煩苛必資簡易朕永懷至理思至還淳  
每懷哀矜之心屢申寬大之詔寔欲人皆知禁化洽  
無爲頃者已令法官每刊刑典夫共理親人在於郡  
守縣令今二千石朝廷精擇得其人縣令委之選司  
慮未盡善孰若連職同官見有踪跡宜令天下大守  
各舉堪任縣令一人善惡賞罰必及所舉所司仍明  
作條例每搜羅賢俊旌賁丘園猶慮遁跡藏名安卑  
守位瞻言及此寤寐思焉其諸色人中有懷才抱器  
未經薦舉者委在長官審訪具名錄奏禮之王制垂



範作程亦既觀德訓人孝敬故天子七廟諸侯五廟  
大夫三廟士一廟孝享奉先亦各有辨今三品已上  
乃許立廟旁言廣敬載感於懷其京官上員四品清  
望官及四品五品清官並許立私廟京官五品已上  
正員清資官階相當並五品已上正員外清官父母  
先亡歿無官號者並與追贈又父有封爵合傳授子  
孫或緣申請遲違准式遂停承襲如有此色自開元  
以來宜令所司審加勘責灼然合襲者特宜許襲天  
下侍老百歲已上賜綿帛五段粟五石八十已上綿  
帛三段粟三石丈夫七十五已上婦人七十已上綿

帛二段粟兩石大清真道士各賜物三十段陪位道  
士共賜五百段亞獻太子賜物二千疋終獻榮王琬  
賜物一千段文武百官及有職掌各賜帛有差率土  
之內賜酺三日

十三載二月甲戌御興慶殿受冊尊號爲開元天地  
大寶聖文神武證道孝德皇帝禮畢御勤政樓大赦  
天下制曰王者事天明事地察修身慎行孝德彰矣  
故風化天下和睦興焉致敬宗廟祖考來格是則禮  
莫大於嚴享孝莫大於揚名有以通於神明有以廣  
於四海朕承真之道繼聖之業欽若先訓惟懷永圖



寶儉寶慈無爲而理自南自北有截來威五教聿興  
家服仁孝四靈咸盛物應純誠百郡公卿萬方夷夏  
僉奉玄貺徵長發於真源屢薦鴻名願昭彰於至德  
封章守闕於再於三加以聖祖錫符玄中啓廸天心  
垂裕榮光降臨敢不丕承固執坤讓乃展因心之義  
以弘推尊之典虔上册禮齋肅思誠入室倏然敢忘  
於日出戶而聽庶幾有聞揚美謚於無疆展永懷於  
罔極且敬從拜後禮既尊先式副群心以允成義以  
今日敬膺典册曰開元天地大寶聖文神武證道孝  
德皇帝大號載崇祇若增懼宜因布和之序式弘在

宥之澤可大赦天下自天寶十三載二月九日昧爽  
已前大辟罪已下罪無輕重已發覺未發覺已結正  
未結正繫囚見徒嘗赦所不免者咸赦除之官人犯  
入已贓不可更令却上後不須爲累其左降官並稍  
量移近處反逆緣坐流配之色宜與量移其王鉷李  
林甫柴崇躍阿布思等並寄任非輕苞藏特甚原情  
議法深所難容况日月未淹罪坐尤重即從寬宥何  
以懲肅應緣親累流配者並不在該及之限左降官  
承前遭憂皆不得離任孝行之道所未弘通情理之  
間深可哀恤如有此類宜並放歸仍申省計至服滿



之日准法處分自今已後編入嘗式其中有非及逆緣坐及情理切害有父母年老不任相隨無昆弟養者許停官歸侍及有身已衰老久罹譴責願停官者委本道採訪使簡擇具名牒中書門下然後放還鰥寡憚獨之絕者量加賑給三載黜陟百王令典殿最之迹庶問攸歸欲更別遣使臣慮有煩擾今載宜委本道採訪使具官人善惡奏聞以申勸阻自臨御以來四十餘年棧樸延想寤寐求賢林藪無遺旌招不絕猶慮升平已久策業增多至於徵求或遺僻陋其博通墳典洞曉玄經清白著聞詞藻宏麗軍謀出衆

武藝絕人者任於所在自舉仍委郡縣長官精加銓擇必取才實相副者奏聞朕尊榮先謚霜露增感於以孝思無忘錫類其內外見任官階俱是三品已上父未有五品官及無官已亡歿者宜各贈五品官及母無邑號者亦與追贈其見任四品五品清官官階俱是五品已上者亡父母先無官號亦准此追贈且厚其風俗五教之旨聿興賁於丘園十翼之風斯在其士庶間衆推孝弟異代義居高尚確然隱遁巖穴者委採訪使博訪聞薦其孝義之人已經旌表雍睦無易純至有終若美鄉閭深可嘉尚各賜勳兩轉以



彰德行天下侍老百歲已上版授本郡太守婦人版授郡夫人各賜綿帛五段粟三石八十已上版授本縣令婦人版授縣君各賜綿帛兩段粟兩石太清宮闕聖祖仙居頻降休徵屢貽啓迪不有優異豈表殊嘗其本宮道士宜各賜物三十段道門威儀王虛真賜物五十段陪位大德各賜物二十段因心推崇增山美謚推官統職必在正名今以大嘗尊事宗廟安可別署爲名禮不逼尊情期達敬五陵署改爲臺其獻陵臺等五令及丞并升一階以彰崇奉五嶽四瀆及名山大川并靈迹之處先賢祠廟各委郡縣長官

致祭其有陵墓祠宇頽壞者量情修葺亞獻皇太子璵賜一千段終獻榮王琬賜物五百段其餘各賜階爵有差其郡守縣令職在親人必務公勤以康黎庶凡所推擇皆竭乃誠寵錫之間須甄異等普恩之外太守等並賜爵一級縣令賜勳兩轉庶期勉勵以表朕心其京文武官一品賜物一百疋二品八十疋三品七十疋四品五十疋五品三十疋六品二十疋八品九品各二十疋北京留守節度採訪使並京官唯勅出使未廻者所賜物並同見在例左相陳希烈純粹之道載穆朝廷大儒之風式瞻師表且協和時令



翊贊升平柔嘉其德克壯元老與一子五品官賜物五百疋攝太尉真瓚上册書寶冊讀冊右相楊國忠當朝正色百僚綱紀廉節遺身三階柱石况發揮孝理潤色鴻猷金玉王延典禮增緝不有殊等何用爲勸宜與一子三品官仍與一子五品官更賜物五百段左僕射安祿山以真一之心摠文武之任出清北落入贊南宮旣押登歌又揮寶冊與一子官更賜物四百疋攝太尉張均太清宮祠及修儀注等使普恩之外又賜物一百疋武德功臣及貞觀初宰輔等緬想忠義感會風雲用集大勲肇興王業其有子孫零落

冠冕陵夷無任官宦者宜令所司勸責依資與一人京官唐元勳臣績叅締構錄勞念舊每寘於懷普恩之外宜放一子出身如已出身所司依資與一官率土之內賜醕三日

十四載捌月辛卯是月天長節上御勤政樓宴羣臣下制曰朕臨馭萬邦迨今四紀曷嘗不虔誠至道銳心庶政昊穹孚祐俗致升平仁壽之域漸登太和之風斯在比歲小有僭亢頗非豐稔遂使開倉賑乏空圖恤刑兼蠲徭省賦故得家給人足頃者農功正興而霑澤頻阻言念黎獻匪遑底寧是用發於精誠庶



平昭鑒至誠上達膏雨應期俾夏苗如雲秋穫不日  
周覽原野宛同茨梁豈惟有慰朕懷寔亦尅符人慶  
此皆上玄垂貺宗社降靈豈曰朕躬所能通感屬天  
長令節盛德在余爰因歡慶之辰用申雷雨之澤其  
天下見禁囚徒有犯十惡及謀殺僞造頭首罪至死  
者特宜免死配流嶺南遠惡處自餘一切釋放故聖  
人積不涸之泉王者用無窮之府支計苟足多賦何  
爲天下百姓今載租庸並宜放半所運糧儲本資國  
用大倉今旣餘羨江淮轉輸艱勞務在從宜何必舊  
數其來載水運入京宜並停如聞天下諸郡逃戶有

田宅產業妄被人破除並緣欠負租庸親隣貨賣及  
其歸復無所依投永言此流須加安輯應復業者宜  
並給還縱已代出租庸不在徵陪之限書云咸秩群  
望詩曰懷柔百神永惟明徵豈忘昭報今秋稼穡頗  
勝常年寔賴靈祇福臻稔歲其五嶽四瀆所在山川  
及得道升仙靈迹之處宜委郡縣長官至秋後各令  
醮祭務崇嚴潔式展誠享無廣屠宰以備牲牢其天  
下侍老宜各量賜米麥又親人之要令長爲重比雖  
精選未盡徵求卓魯之才或遺蒲密之化安寄宜令  
京官五品已上正員文官三品已上正員武官及郎



中御史各舉堪任縣令一人具名申省委有司試擇  
奏授其有善惡賞罰與舉主並同僚作期限一時令  
集王制下士視上農周政庶士階祿若衣食既足則  
庶耻乃知至於資用靡克或貪求不已敗名冒法寔  
此之繇輦轂之下尤難取給其在兩京文武九品已  
上正員既親於職務可謂勤心自今已後每月給俸  
食雜用防閑庶僕等宜十分為率加二分其同正員  
官加一分仍永為管式其南衙九品已上并京兆府  
畿令等宜共賜物二萬疋左右龍武軍各賜一千疋  
其唐元功臣念言勳舊宜異常倫兩軍各賜物二千

疋餘各有差庶生成之澤自葉而流根慶賞之恩繇  
衷以暢物宜宣示遐邇知朕意焉

十五載八月庚辰玄宗至蜀郡癸未大赦天下制曰  
朕以薄德嗣守神器何嘗不乾乾惕勵勤念蒼生至  
於水旱或憊則禱祠請罪邊鄙微擾則齋戒思過聿  
來四紀人亦小康蓋祖宗之靈卿大夫之助也是以  
推心將相不疑於物而奸臣克黨負信背恩剝我  
黎元暴亂我函夏皆朕不明之過豈復有人哉楊國  
忠厚歛害時已肆諸原野安祿山亂常構禍尚逋其  
斧鉞朕用巡巴蜀訓勵師徒命元子北畧朔方諸王



分守重鎮合其兵勢以定中原將盪滌煩苛大革前  
弊思與億兆約法惟新上以奉宗廟神祇下以寧華  
夷動植可大赦天下其天寶十五載八月一日昧爽  
已前大辟罪已下嘗赦所不免者咸赦除之自兵興  
已來有破家者一切與雪流人一切放還左降官各  
還舊資内外文武官節級賜階爵安祿山脅從官有  
能改過自新背逆歸順並原其罪優與官賞



